

乾隆甲戌年鑄

廣靈縣志



重修廣靈縣誌序

余承乏廣靈甫下車即取  
縣乘閱之疑其於

本朝之良法善政缺焉弗詳節  
婦孝子寥寥無幾及考其  
成書之期乃知出自前令

序

李公之手已週甲子矣時  
即欲續纂之未遑也今蒞  
任七載簿書之暇已多所  
採訪又值

聖明御宇文教覃敷通典通志  
無弗修輯靈雖邊邑數十



年來政事之沿革士民之  
懿行豈庸久而失傳爰於  
紳士中延其宏博端方才  
堪任事者共勦厥事或稽  
諸案牘或傳之父老或採  
之野史務使寔而有據俾

序

二

人心允服寧疑以傳疑不  
敢訛以傳訛也至其地方  
之利弊商賈之疾苦予力  
所未能遽為興除恐流為  
他年之遺患者亦必預書  
於冊以俟後之君子若夫



統論誌書之由來以及誌  
書宜修輯不宜殘缺一切  
議論前賢言之詳矣邑誌  
舊序俱在余亦不多贅云  
乾隆十九年歲次甲戌仲秋  
賜進士出身知廣靈縣事  
中州

序

三

郭磊書於署之茂榆堂





續修廣靈邑誌序

嘗聞莫爲之前雖美弗彰莫爲之後雖盛弗傳前作後述古聖賢相須而有成者歷代皆然矧國之史邑之誌事關通典爲民風政治之所維係顧可任其久弛而不續修也哉廣靈邑誌始修於李公煥斗之手其山川疆域風土文物以及節婦義士孝子順孫罔不備載但歷年久遠歲已週甲無復起而纂繼之者適邑侯 郭公臨蒞茲土政通人和百廢俱興簿書之暇慨然以續修爲已任爰是殘缺者補之失次者序之損益協中斟酌盡善煥然成一邑之偉觀是誌

廣靈縣誌

卷首序

一

也經始於李公續纂於 郭公凡延陵前數百年政治之沿革士民之懿行不允賴二公以垂不朽哉


大同府廣靈縣儒學掌印訓導周天申謹題




縣境全圖









縣城圖





學宮圖






廣靈縣志

卷首圖

五





廣靈縣誌

凡例

- 一星野誌天文門一遵舊誌不敢妄議其舊誌星圖偶有舛錯韓子廷魁精於天文酌爲改正災祥門明嘉靖以前無可考稽不敢增入
- 一舊誌內事介疑似者不敢議改議刪恐後人見聞未必如前人也惟附會舛錯人人共見者酌行刪改
- 一人物誌內惟事業人品照耀千古真堪不朽者方爲立傳次則於本人名下附立小傳以俟將來示慎重之意也

廣靈縣誌

卷首 凡例

一

一舊誌每卷前有小引後加論曰忽用李公語氣忽用紳士語氣幾無以辨今妄爲刪訂

一誌乘之設無取誇多而鬪靡故藝文內無關政治無關風化者舊文間有刪削

一舊誌凡誥命之詞皆載緣廣邑登仕籍者少故載之以備一覽他邑誌內無是今亦止載封贈者之姓名而不載其詞廣邑風會日盛恐傳之又久載不勝載也

一營建誌內止立縣圖城圖文廟圖以餘皆改移無定也



一同事之人雖有嘉言善行經上憲嘉獎者亦不採入  
遠嫌也

一男夫一行足取婦女節行足嘉尚未合例者並紀於  
後與人爲善之意也



廣靈縣志 目錄

卷首

序

圖

凡例

修誌姓名

卷一 方域

沿革

星野 災祥附

疆域

形勝

鄉里 寨洞墩舖舍古蹟塚墓附

市廛

卷二 營建

城池

公署

文廟

廣靈縣志

卷首 目錄

一

壇壝

祠廟

坊表 養濟院等附

卷三 山川

諸山

諸水

景物

橋梁

卷四 風土

鄉俗

物產

卷五 賦役

田賦 起運留支附

稅務

倉儲

戶口

卷六 政令



鄉約 卧碑 詳文

告示 條約

卷七 秩官

知縣 教諭 訓導

典史 武職 教場草場 武備附

卷八 選舉

進士 舉人 貢生

例監 武舉 仕宦

椽吏 鄉飲 封贈

襲廕 農官

廣靈縣誌 卷首 目錄 二

卷九 人物

忠烈 孝行 義舉

貞節 孝婦 後編

卷十 藝文

記 傳 贊

詩

卷末

舊誌序 乙丑修邑誌姓名

辨疑 雜錄



廣靈縣修誌姓名

纂修

知

縣

郭磊 玉璞

檢閱

訓

導

周天申 憲卿

協辦

生

員杜暉 子東

增

廣

生

員李元凱 若杜

增

廣

生

員杜晟 子彥

生

員白百齡 先五

廣靈縣誌

卷首

一

採訪

候

選

教

諭韓廷魁 敏正

生

員韓士傑 掌圓

候

選

訓

導薛搗謙 子恭

候

選

訓

導譚民聽 政行

廩

膳

生

員仝懋官 樹德

廩

膳

生

員劉輝 映川

廩

膳

生

員王蓋臣 篤斐

生

員白維翰 殿邦

校對



生

員孫尚元 長善

增

廣

生

員王國瓚 玉藻

廩

膳

生

員韓士奇

生

員宋生桂 步月

勸捐

監

生宋洪道 重任

監

生邱集鳳 文峰

生

員薛龍章 義文

監

生張偉 傑靈



廣靈縣誌卷之一

方域誌

廣靈葭爾邊邑秦漢而上或列荒服或隸版籍不知幾經滄桑秦漢而後忽爲郡忽爲邑若建國若置軍不知幾經沿革自石敬瑭割幽薊十六州以賄契丹陷此土於徼外者幾五百年中間雖有一統之主倏取倏陷迄無寧宇至有明始收復版圖但兵燹洊更文殘獻闕履土而問往跡懵如射覆不亦宜乎至於畫界分疆犬牙相制按籍而稽可考而知也爰分沿革星野疆域形勝鄉里市廛彙爲一冊而以方域統

廣靈縣誌

卷一 方域

之後之考廢興鏡得失者將於是賴焉誌方域

一沿革

廣靈禹貢冀州之域虞析冀爲幽并三州地屬并夏仍屬冀商封同姓爲代子屬冀周屬冀春秋屬晉後趙襄子滅代而有其國屬趙秦併天下置雲中郡代郡屬雲中漢高祖封愛子於代郡置延陵平舒二縣隸代郡東漢延陵廢魏晉皆沿平舒後趙縣廢後魏置懷荒禦獒府志作禦遠二鎮東魏置北靈邱郡後周爲蔚州地隋屬上谷唐元宗開元間置安邊縣肅宗至德二年改爲興唐縣屬興唐郡隸蔚州後五代唐莊




宗同光二年契丹蕭阿古只寇蔚州始於此置廣靈縣石晉割幽薊十六州賂契丹此地亦陷焉遼置忠順軍隸蔚州金仍舊元改廣陵縣尋復爲廣靈縣隸上都路宣德府明改隸大同府編戶九里府志作編戶八里國朝因之順治六年改陽和爲府未幾復大同府縣仍屬蔚州雍正七年以蔚州改隸宣化府縣始屬大同府一星野災祥附此條多係貢生韓廷魁改訂

廣靈爲趙西陞天文昴畢分野按周禮職方并州以恒山爲巨鎮大同全郡正屬恒山恒山入昴五度則占宜昴又趙之大梁自胃七度至畢十一度大同其北郡也則占宜畢昴畢皆趙之分野大同之占昴畢由來舊矣廣靈隸大同之東距恒山不遠則廣靈當占昴畢無疑



昴



廣靈縣誌

卷一方域

三


隋丹元子步天歌曰昴七星一聚實不少阿西月東  
 各一星阿下五黃天陰名陰下六烏芴藁營營南十  
 六天苑形河中六星名卷舌舌中黑點天譏星礪石  
 舌旁斜四丁

占驗附

昴十一度下為日月中道乃天之耳目又為旄頭凡  
 占驗大而全動若跳躍者主邊外兵起一星獨動主  
 犯邊熒惑守其北主燕趙兵起太白守之主邊外兵  
 動天阿一星在胃東月一星在昴東主女人災福天  
 陰五星在畢柄西主從天子弋獵之臣天苑十六星



在昴畢南如環狀主天子苑囿養禽獸之所芻藁六  
 星在苑西主供苑養卷舌六星在昴北河中天讒之  
 外主口語以知讒佞天讒一星在卷舌中主醫巫礪  
 石四星在卷舌東五車西主磨礪鋒刃





隋升元子步天歌曰畢恰似瓜又八星出附耳一星畢股光天街兩星畢背旁天節耳下八烏幢畢下橫列六諸王王下四阜天高星節下團圓九州城畢口斜對五車口車下三柱任縱橫車中五個天潢名潢畔咸池三黑星天關一星車脚邊參旗九個參車間旗下直建九旂連旂下十三烏天園

占驗

附

畢十七度主邊兵弋獵其大星曰天節主邊外之尉凡占驗明大則遠方入貢失色則邊兵亂動搖則邊兵起木犯有軍功又曰畢爲天馬昂畢間二星曰天

街主國界街之南主中夏街之北主邊外金火守之主邊兵起附耳一星在畢下主聽得失若明盛則中國微有盜賊邊埃驚動移則讒佞行兵大起於邊尤甚天節八星在畢南主使臣之所持諸王六星在五車南天漢之中主宗藩天高四星在參旗西北近畢此臺榭之高主遠望氣象晦則主官失守五車五星三柱九星共十四星在畢東北五車主天子五兵天潢五星在五車中主河梁津渡咸池三星在天潢南魚圍也天關一星在五車南畢西北亦曰天門主邊塞事參旗九星在參西五車之間天旗也玉井西南



曰九旂天子之旗也主導軍進退天苑之南十三星曰天園植菓菜所也

災祥

明

嘉靖十五年七月飛蝗蔽天食稼殆盡 十六年六月有黑青如斗百日乃止 三十三年歲大饑 萬曆五年白虹晝見百日乃止 九年四月地震有聲如雷 十一年三月地震壺河竭自辰至未始流 十三年春夏不雨詔免夏稅十分之七 二十九年春不雨夏隕霜詔免秋稅十分之六 三十七年夏

廣靈縣誌

卷一 方城

六

秋旱 三十八年大疫 四十六年九月地震官民庭舍多圯壞 四十七年二月大風晝晦 天啓二年十一月天鼓鳴星隕 六年六月地震有聲 崇禎元年夏旱秋霜 二年饑疫 十二年春大風晝晦四月大雪

國朝

順治元年七月疫 四年七月飛蝗 五年蝗子熾 盛十一月姜瓖叛 六年土寇圍城蝗化蜻蜓太白晝見 十年六月大雨九月大雪十一月疫作 十四年九月地震 十五年四月隕霜 十六年春大



雪 康熙三年夏霜秋饑彗星見

詔發內帑賑濟全免地丁錢糧 十二年九月地震二次

有聲 十八年大旱七月始雨地震有聲 十九年

春夏大旱

詔免夏稅十分之三 十月留老曠牛產麒麟 十一月

彗星見 二十年大饑

詔賑二次仍全蠲屢年逋賦並本年地丁錢糧 二十二

年十月地震有聲 二十七年饑 四十四年飛蝗

四十七年六月雨雹 五十七年二月大風晝晦

五十九年六月地震 雍正十一年十月太白晝

廣靈縣誌

卷一 方域

七

見 十二年六月雨雹 乾隆六年雨雹傷稼 八

年九月彗星見西方壁宿度內至九年二月始沒

十年霜災 十一年六月雨雹二麥被災 十八年

杜鵑來螞蚱多

一疆域

廣靈縣境南北廣八十里東西袤八十五里 府志廣

里輪一

東至蔚州石橋溝界二十五里 至州城

東南至蔚州北口七十里 至廣昌縣一

南至靈邱縣泥泉嶺界四十里 至縣城



西南至靈邱縣漫山村七十里至平刑關一百五十里

西至渾源州分水嶺界六十里至州城一百二十里

西北至天鎮縣火燒嶺頂六十里至陽和一百八十里

北至大山夾石溝口界四十里至天鎮縣一百四十里

東北至樺澗嶺口四十里至直隸西城八十里

縣治西北至大同府二百四十里西南至太原府七

百二十里東南至京師五百三十里

一形勝

廣靈連上谷而接雲中萬山環拱北枕桑乾南控太

白西接亂嶺東距洪渡中帶壺流地居恒代之衝壤

廣靈縣誌

卷一 方域

八

連趙燕之界畿輔之肩背雲鎮之襟喉也舊誌謂守  
望狐之要害而餉道無虞近蔚蘿之輔車而犄角可  
恃居然西北屏翰之奧區焉

一鄉里 古蹟塚墓  
寨洞墩附

四鄉舊共村庄八十有五編作九里

嘉順鄉

東台堡 蕙花村 八角遞 劉家新庄

東西河下 東西姚疇 東西加斗 羅家疇

東西石門 殷家庄 洗馬庄 焦山係官堡

東焦山 西焦山 龍虎岩



安流鄉

榆林堡 翟家疃 直峪村 東西宜行 集興疃

許家庄 留老疃 滙里 聶家溝 塔兒村

愁崖窰 田家窰 坟台溝 麻地溝 馮家溝

平寧鄉

平水城係官堡 作疃 尚家疃 南百家疃

百家疃係官堡 北百家疃 土嶺 南村係官堡

黃龍庄 梁家庄 馮家庄 臨灌 海子

堰子 墨家溝 狼虎坪 望狐村 木廠

國家脊 喬頭村 邢家庄 車家堡 小關

廣靈縣誌

卷一 方域

九

劉之近 井窰村 惡峪村 劉家庄頭 白羊村

莎泉村 黑土窰

靜樂鄉

一斗泉 井子窰南 岳家庄 榆林子 土巷口

裴家窰 王家窰 滴水岩 巧八庄 暴峪村

鄭家窰 羊圈村 峯西村 大南溝 曹家川

瓦房村 高家窰 師家窰 馬家山 黃泉子

鹿骨村 古道渠 梁草澗 北道岩 苑家庄

新增庄村

南加斗 大西灣 小西灣 吳家溝 大林岩



小林岩 柳溝寺 王家溝 香溝庄 大黑圪塔

大台庄 賀家溝 半落山 圈頭庄 杜家庄

黑峪洞 大山庄 板塔寺 橋兒澗 白塔村

南溝庄 邱家灘 賀家窰 張家窰 香爐臺

寬會庄 山神廟 上寺庄 庄子溝 天澗村

南汗水 念槽溝 卧羊廠 朝陽灣 北石場

麻黃溝 庄窩村 栽子溝 周圖寺 榆溝村

鐵鑊崖 風吹嶺 神樹溝 石堂溝 白家坎

韓家庄 荆家窰 劉家灣 黃龍村 賀家堡

闖道坡 史家坪 曹家庄 水澗村 白家庄

廣靈縣誌

卷一 方域

十

桃子庄 紅花林 南會村 劉家小庄 邵家庄

中庄子 南堡子 西庄子 泥泉嶺 榆樹灣

道袍溝 魏石溝 張岔庄 張岔口 房家庄

西蒲庄 炭堡 南柯崖 劉家溝

以上新增村庄七十四處並附入九里新舊共一百

五十九處

九里

隆復里 留老里 百家里 梁家里 壺川里

加斗里 平政里 石門里 蒿家里

寨洞墩舖



鎮寇寨

在縣北一斗泉

古岔寨

在縣西馮家庄

鐵裹腰封寨

在加斗山峭岩壁立狀若鐵裹中有懸橋遇驚登寨橋旋撒入如腰封然故名

勤漢寨

在臨灌山常修避兵故名

蓮花寨

在縣南十五里八峯環峙苑如蓮花故名觀

音寨

在白羊山上觀音寺

惡峪寨

上巖壁立下跨深澗巖畔突出一峯居民懸橋渡之

避兵

任家洞在干福山後

周家洞

在縣西北三十里

以上諸寨洞居民預設水器柴薪遇驚各攜老幼裹

糧登避

馬家山墩

去城二十五里接平原塢

平原塢墩

去城四十里接火燒嶺

以上東北路

火燒嶺墩

去城六十里接台子梁

台子梁墩

去城五十里接臨灌口

廣靈縣誌

卷一 方域

十一

以上西北路

臨灌口墩

去城四十里接唐山口

唐山口墩

去城二十五里接直峪口 直峪

口墩

去城十五里接紅沙坡

紅沙坡墩

去城十五里接石門峪

以上西南路

石門峪口望川墩

在蔚州界去縣二十五里

以上東南路

舖舍

清溝舖

在縣東十里

洗馬庄舖

在縣東二十里

以上東達蔚州

翟家疇舖

在縣南五里

塔兒村舖

在縣南二十五里



以上南達靈邱

城西嶺舖在縣西五里

邱家灘舖在縣西十八里

南村舖在縣西三十里

趙家坪舖在縣西四十五里

望狐村舖在縣西六十里

以上西達渾源州

在城總舖三

古蹟

長城在直峪山漢武帝元光五年所築遺趾見存

平舒城在縣西十里平水村南即漢置平舒縣遺趾

見存

廣靈縣誌

卷一 方域

七

寡婦城在縣東七里相傳夫斃鋒鏑妻築城以居遺

趾見存

古城在縣南三里遺趾太狹恐非邑故墟相傳秦皇

所築未有所考

塚墓

遼尚書高起墓

在縣西二十里南百家疇村前

金諸王陵

在縣東五里俗呼亂塚相傳金諸王葬於此今丘壠殊高不類民塚

信武將軍康筠墓

在縣西三十里北土嶺村西里許

元侍郎龐清墓

在縣東二十里洗馬庄石獸翁仲俱存

元帥張守中墓

在縣西二里有翁仲俱存



同知齊震墓 在縣西三里 壺河南濱

知州聶諒墓 在縣東十五里 加斗村有碑

明侍郎齊韶墓 在縣西北十里 井子窰村 南有大松樹數株有碑

忠義寺丞李景墓 在邑屬壇南有碑 邑令郭公重修

義士仝觀吉墓 在城南里 許有碑

通判白塗墓 在縣東北 五里有碑

蔚州總兵馬芳墓 在縣北 十五里

同知金居義墓 在縣東北 五里有碑

儀賓溫墓 在城東三十里 羅家疇北

儀賓武進儒墓 在城西三十里 南村東里許

廣靈縣誌

卷一

方域

三

孝子韓一 蘇墓 在城西三十里 歐墓 南村北里許

義士周于 德墓 在城北二十里 道墓 里一斗泉

義士李 奠墓 在城

一市廛

在南關一處 三六九 日集



廣靈縣誌卷之二

營建誌

一邑之建設一方之保障憑焉春秋用民之力雖時亦書誠重之也廣靈邊鎮要土昔日用武之區明季甃石砌磚增修不一今城郭完固溝池浚深屹然一金湯也至於發號施令以出治則有公署釋奠明倫以敷教則有學宮而書院者人材之淵藪也壇壝祠廟者祀典之攸關也紺宮碧宇樹表立坊萬民之觀瞻係焉是皆不可畧者誌營建

一城池

廣靈縣誌

卷二 營建

一

廣靈城舊爲土築肇於唐莊宗同光二年中間紀載缺如莫得其本末明洪武十六年知縣葉公時茂重修天順間御史馬公以廣邑城卑薄奏請增修報可命蔚州知州史公魁增築後知縣程公觀孟公繼先孫公武臣馬公應明馬公志誠相繼增修萬歷二年兵部侍郎吳公兌奏請發內帑命知縣喬公密改建甃以磚石周圍三里一百八十步高三丈六尺堞六尺脚濶三丈頂濶一丈五尺堞口四百七個城有二門南曰景陽北曰永安門上建樓二座各三間二層四隅建角樓四座今廢止存東南隅一座名魁星閣鋪樓八座今廢壕



深三丈廣如之崇禎十三年戴公君恩於兩門外各築護門磚臺二座

### 一公署

縣署在城東街洪武七年縣丞高輝建正統成化間知縣劉銓王用相繼增修康熙年間邑令李公煥斗重修外爲照壁大門三間儀門三間東西二角門戒石坊一座大堂五間儀門內東西六房吏舍各五間大堂後思補堂三間宅門三間三堂三間三堂東書室三間次北住宅三間後爲庖廡之所  
禁獄在大門內西南有獄神祠

## 廣靈縣誌

### 卷二

營建

二

典史宅在縣治右

學署在文廟左大門三間二門一間東時習齋西日新齋明倫堂五間堂後住宅三間

察院

在縣治南今廢改書院

陰陽學

缺

醫學

缺

僧會司 在聖布壽寺

政分司

久廢

府館

久廢

### 文廟

文廟在縣城西北隅洪武初縣丞趙自立創建宏治乙卯邑令陳公觀重修嘉靖萬歷中屢加增葺康熙五年焦公恒馨重修前爲櫺星門左德配天地坊右道冠古今坊門內泮池上跨磚橋

池中李杏樹各一株橋北爲



戟門三間中爲大成殿五間大松東西兩廡各五間

殿後崇聖祠三間大松戟門左右名宦鄉賢忠義祠

各三間

祭器

鼎 爐 燭臺 祝板 爵 登 鉶 簠 簋

籩 豆 俎 毛皿盤 酒罇 帛櫃 鼓 樂器

缺 庭燎 齋戒牌 滌牲桶

書籍

上諭四本 五經大全 性理大全 性理精義

書經傳說 詩經傳說 春秋傳說 二十一史

廣靈縣誌

卷二 營建

三

十三經 明史 周易折中 四書解義 康熙字

典

欽定四書文 名教罪人詩 駁呂留良講義

學田

明各上司共置地二頃六十畝除開荒外實在熟地

一項九十八畝每歲該租穀市斗一十九石八斗分

賑貧生

忠義祠在戟門外右祀

明聶友良 王尚文 楊汝澄

袁 表 董 莒 趙昌齡



蘭朝海 李景

國朝 韓一蘇 韓一歐 周于道

周于德 李冀

名宦祠在戟門外左祀

明邑令葉時茂 孟繼先 喬密

韓希寵

國朝邑令杜汝浮 范發愚 焦恒馨

朱彝 李煥斗

鄉賢祠在戟門外右祀

後魏古 弼 伊 馥 庾 葉

廣靈縣志 卷二 營建 四

元 聶 諒 張守中 李景

王尚文

書院邑令杜公坦修在南門內路東南向右鄰貞節

祠

一壇壝

先農壇 在城東北里許每年祭品銀叁兩伍分廟前

積貯五年糶售以作祭品

之用不敷赴司請領

社稷壇 在城北里許春秋致祭豕

風雲雷雨壇 在城南里許春秋致祭豕

邑厲壇 在城東里許清明日七月十五日十月初



粵祭壇 在壺山上是日置水器柳枝用優歌

春場 在先農壇至日設春筵用優歌

一祠廟

城隍廟在城西街正統九年知縣孫公敬重建

玉皇廟在北關

關帝三代祠在南門外

關帝廟三一在南門外一在東臺村外今廢一在東臺

村東門外

文昌宮在學宮右偏雍正四年教諭葉公澄首倡捐

俸創建正殿三間東西官亭二間戲樓三間庖廂三

間

文昌閣三一在南城門樓一在南門外東關門上

奎星閣二一在城東角樓一在學宮前雍正四年教

諭葉澄倡建

龍神廟四一在社臺山一在北關東門外一在壺山

一在城隍廟左側

瘟神廟在城隍廟內

元帝廟二一在南關水巷門內一在北甕城

北嶽廟在干福山

豐水神祠在壺山頂



東嶽行宮在蕙花村

財神廟二一在城隍廟右側一在東關門上

禹王廟在縣治前

馬神廟土地祠在縣治大門左

三官廟二一在東臺東門外東北一在西關門上

岳忠武廟在西關門上

八蜡祠在城西數十武

春秋致祭豕一  
羊一俎豆各五

聖壽寺在城北街西

大士庵在南關

興勝寺在龍虎岩

白羊寺在白羊村

周圖寺在唐山巔

石佛寺在唐山峪

天井寺在周圖寺東

聖佛林在直峪南山

石湖寺在留老山

三教寺在翟家疇西

西照寺在廻嶺北

崇善寺在一斗泉南

安堅寺在留老疇村



聖泉寺在宜興南山

老君堂在鄭家窰

觀音寺在峯西村

柳溝寺在柳溝庄

保真觀在縣西二十里廢今

集仙觀在縣西三十里廢今

凌霄觀在縣東南翠虛臺

八角寺在八角遞村外

板塔寺在大山頂

貞節祠在城門內路東祀

廣靈縣誌

卷二 營建

明朝

劉梁氏劉大海妻

譚趙氏譚龍妻

董王氏董繼妻

任韓氏任朝陽妻

國朝

任譚氏任斐小妻

王李氏王前陳妻

梁周氏梁士彥妻

梁宋氏梁士達妻

梁宋氏梁六德妻

梁曹氏梁遇春妻

曹王氏曹維均妻

坊表

御史坊

在北街御史齊韶立今廢

畫錦坊

在北街舉人墨芸立今廢

勅贈忠義



坊在北街為寺貞節坊在南街劉大雲路指南坊在南

關東街舉人進士坊在南關東街進肅儀坊在南關

劉坐建今廢班趙智儒林坊在儒旬宣坊在布政分承流坊在十

南宣化坊在十字牧愛坊在十字教化坊在十字平

政坊在北街澄清坊在察院陰庇一方坊在城隍威

震華夏坊在城門前貞節坊在龍虎岩曹維百歲老

人坊在八角遞為均之妻王氏立

雍正三年欽奉

上諭勸募好善之人於通衢大邑人烟稠集之處照京師

例建設普濟堂育嬰堂使老疾得依倚幼穉不至失

所

養濟院在北城內路東

育嬰堂在南關

留養局在城隍廟隔壁



廣靈縣誌卷之三

山川誌

宋夾漈鄭氏曰州縣之設有時而更山川之形千古不易故禹貢分州必以山川定疆界廣靈四面皆山自太行發脉由鴈門入應州至渾源之亂嶺關右旋由白羊南山趨蔚州左折由大山抵宣府界水則發源莎泉合壺山神泉南繞縣城東經蔚州北注襄山東麓至宣府順聖東城合于桑乾此山川之大畧也爰誌山川而以景物橋樑附焉

一諸山

廣靈縣誌

卷三

山川

飛鳳山在縣東二十里

府志作縣東北二十五里

一岡突兀軒然

翔起

下有洗馬庄卽元侍郎龐清故里清曾爲洗馬故名今訛洗爲西

瓦房山在縣東北四十里形如瓦房故名

老山在縣東北三里其山皆石

見府志

華山在縣東北四十里其山產樺上有三分岩

見府志

巧八山在縣北二十里

府志作三十里

其山居中四圍七山

相向東南十里有滴水崖泉脉自穴中出滴水成池大山在縣北三十里礪道直躋峻而不險至嶺巔頗廣漫復聳一山名平原塙高插雲表北瞰陽和塞南望太白峯宛在指顧間道通天鎮陽和折西夾石溝



爲縣北界從此趨下磴道盤旋馬不並馳設伏以守  
寇不能度亦縣北屏障也臥龍岡在縣北八里山脉  
蜿蜒自西而來凝結東向與龍伏岩對峙左右宛然  
二龍蟠戲

平頂山在縣北三十里

見府志

牛欄山在縣北三十里其山週圍有石欄

見府志

千福山一名千福山在縣西北五里相傳前代遣千  
人取花斑石于此上有北嶽行宮每年三月十七日  
縣民祈福于此故又名千福山

九層山在縣西北二十五里上有九層崖

見府志

廣靈縣誌

卷三 山川

二

六稜山在縣西北七十里其山前後各垂三稜

火燒嶺在縣西北六十里

府志作五十里

石梯嶺在縣西二十里渾源要路自麓至嶺石磴陡  
絕似梯明道人高仲寶損高增卑遂爲周道無復登  
梯之難

白羊山在縣西五十里昔有人見白羊往來山上故  
名上有白羊寺遺址

望狐山在縣西六十里

府志作五十里

世傳有神人引狐入

山故名

鞍子山在縣西三里二阜相連宛若鞍形

見府志



黃龍山在縣西三十里昔有黃龍見故名上有黃龍神祠

馬蹄嶺在縣西五十里石上有馬蹄跡

廻嶺山在縣西五十里渾源孔道

社臺山在縣西關內石岡如臺上有龍母神祠土人

六月饗賽于此

斷駕嶺在縣西四十里

天井山在縣西南二十里上有天井寺故址寺有井深五六尺雖旱不竭

臨灌山在縣西南四十里上有石夾流泉以資數里

廣靈縣誌

卷三 山川

灌溉 見府志

遇逢山 府志作玉峯山 在縣南一里相傳有神仙採藥於此人遇之忽不見今石上有足跡存焉

直峪山在縣南十五里卽直峪口靈卽要路下有河注壺流

留老山在城南十五里 府志作二十里 昔袁吉棄父於此其子袁表諫而載歸下卽袁表故里

加斗山又名神峰山在縣東南二十里有圮城形蹟猶存峯巒峭立迥出雲霄有如斗星布列內有石孔似門孤峯挺立其秀麗之狀非他比也下有加斗村



卽元總管聶諒故里

壺山在縣東南里許平地一山兀峙上有大士菴內有石井其水從座下獅口內溢以菓物投之卽由山脚流出環山皆泉如萬斛珠璣隨地而湧匯爲一池週廣數畝與壺河水合夏秋碧光灩澦春冬霧氣空濛人登眺頗裕奇觀舊有豐水神祠飛碓懸樓水碓稻壟今俱廢

諸水

壺流河古名滋水源出縣西三十里莎泉東注壺山下神泉二水合流上狹下闊其形如壺故名經蔚州

廣靈縣誌

卷三

山川

四

至順聖川入桑乾

莎泉在縣西三十里泉約畝許沸騰汹涌淙淙有聲卽壺河發源

一斗泉在縣西北二十里昔鄉人掘井三十餘丈竟不及泉忽水自西山崖畔突出池僅斗許足供百家故名

滴水崖泉在縣北十五里山腰懸崖數丈可容千人水自石隙中流注於潭潭週圍丈餘深僅尺許味殊甘美大旱不竭淋雨不溢遇旱禱雨輒應

作曠海波池在縣西十里西山麓有泉數泓匯爲一



池僅二畝汪洋數里每逢雷雨則水湧漲東流入壺河

灑雨泉在縣南十五里直峪口內源自沙隙突出遇旱使數婦人灑之卽雨北入壺河

鴉兒滙在縣西南四里鴉多飲啄於此暑月有冰人感寒疾取而飲之汗出卽愈諺云壽民丹水

集興噴水在縣南五里府志作十里其水清湛冬夏不竭

注壺河

枕頭河在縣南三里源出翟家疇形類角枕故名東注壺河

廣靈縣誌

卷三 山川

五

石井詳見壺山

神泉詳見壺山卽豐水


常江峪水源出南汗至常江從崖而下入潭萬丈深不可尋底大雨始入壺河

一景物



豐水夜月

廩生韓士奇寫



縣治南數拾武有壺流河一名豐水灘高水白石靜  
 沙明兩岸滌澗一望無際若月夕臨之水天一色月  
 流波底寒映碧空碎影玲瓏清光蕩漾宛若雪夜入  
 山陰道中令人依依不忍去也



社臺朝雨

廩生韓士奇寫



城西關有社臺山臺高敞可遠眺時見山色空濛川  
 光瀲灩上有龍母祠邑人禱雨於此邑侯李公遂  
 命重修之頗亦輝煌若清晨雨景登臺望之致足怡  
 情焉



千福曉鐘



廩生韓士奇寫


千福山距城北五里許頂建北嶽神祠流丹浥翠  
徑曲花幽舍宇出重霄間左右諸峯羅列環繞縣城  
每清晨經課不絕梵貝依稀居民聞鐘聲自白雲來  
廬舍開曉爨烟相望亦多佳致也





斗山積雪

廩生韓士奇寫



斗山當邑中戶牖城裡外皆共見焉山頂多積雪不  
 獨冬春為然也夏亦間有晴天曉望但見積素凝花  
 霏霏微微嶙嶙响响若斷若連若遠若近若玉龍蟠  
 澗若銀河墜影若白鴉之棲遠樹若瓊臺之現碧空  
 儀形因之一靜心胸為之一快也



壺泉春柳




廩生韓士奇寫

城東最近平原曠衍突出一峯峯頂有九江聖母祠  
祠後 大士閣下獅子口噴泉一泓味甚甘美東澹  
爲小池若半規新月池側舊築精舍環以林木爲居  
人登眺遊息之所後廢邑侯李公以是地爲縣治水  
口去路宜聳不宜陷購植柳樹百株疎密交加周圍  
掩映當春夏間淡黃拂水嫩綠含烟悠然自遠



飛鳳晴嵐



廩生韓士奇寫

飛鳳山爲邑東北屏障一峯逶迤向南側出紆折二十餘里回環側抱遠衛縣城望之如鳳翹然忽青忽靄忽丹忽赤冬夏各殊朝夕互異若雨後初晴蒼烟迷樹雲氣摩空亦異觀哉



聖泉松風

廩生韓士奇寫



聖泉寺在南山之西有石泉焉寒流當澗飛瀑懸崖  
厥寺最古兩崖蒼松屈曲交加盤盤菌菌陰翳蔽天  
風濤號谷坐其下者每疑有寶花墜空笙簧隔水也



白羊暮靄



廩生韓士奇寫

縣西四十里層巒而高聳者為白羊山亭雲閣霧窈  
誕離奇四時變態不一最可愛者夕陽在山朱霞映  
日炯炯煌煌光怪怪無所不有遠山觀之猶為奇  
絕

一橋梁

平水橋在城西七里下跨一澗遇大雨其水輒平行  
人病之邑民建砌石橋

八家橋在縣東十里相傳八家環居共建後人誤呼  
為八角橋



廣靈縣誌卷之四

風土誌

昔者太史陳詩以觀民風用以辨貞淫察治忽占盛衰風俗之關於治道匪渺小矣廣邑舊誌稱士有武健之習民尚雀角之爭禮義奪於凶荒疾病惑於巫鬼又好氣輕生喜鬪健訟以聚衆歛錢告官告吏爲辦公事由今觀之殆不誣也夫地瘠民貧旣不免唐魏之儉嗇使其克敦古處循理守法何患邊荒之不  
如鄒魯乎如仍舊習而不改難望風俗之日上矣誌  
風土

廣靈縣誌

卷四 風土

一鄉俗

縣屬居民專務農業應童子試者不過百餘人諸生入則橫經出則負耒士亦農也又其性戀土懷鄉不能牽車服賈凡俯仰交際租稅之費皆取給於田豐年每畝不過數斗居民生長山谷間目不覩奇技淫巧故工匠頗拙亦無他端雜藝婦女不習紡織致富之術百無一焉幸其俗尚儉朴男恥爲盜女少邪行古風猶存塞外矣

正月元旦男女夙興庭院燃煤一堆謂之旺火陳奠脯酒肴祀神祭先畢稱觴爲長者壽以次序拜饌先



匾食已而拜賀交錯燕會數日乃止元夕蒸麵盞燃之中庭仍徧處布置至通衢神祠十四至十六日共爲燈山火樹以慶太平十六日老幼更相結伴出遊云除百病正月初五十六七月初一五月初一冬至等日定更後闔邑婦女皆出大門外燒楮哭聲震天更餘乃止名曰哭節近來紳士能禁約眷屬者亦或不哭二月二日各家早起汲水謂之引龍清明日男女插柳枝備酒脯香楮拜掃塋墓五月五日群插艾葉食角黍飲雄黃酒小兒手足繫束綵縷以避五毒六月六日曬麪曝衣澡浴初伏日亦然七月七日折

柳枝掛楮錢插田中以報田祖日夕婦女列香菓於庭穿針乞巧十四日薄暮採麻穀薦時食於祖先次日祭墳仍將麻穀置之塚上八月中秋節具月餅瓜果饋遺親族至晚陳列菓品剖瓜賞月九月重陽具棗糕菊酒饋遺如中秋十月朔日祭先塋剪紙爲衣焚化墓上謂之送寒衣十一月冬至晨起拜賀一如元旦禮十二月初八日以雜豆棗栗和粳米煮粥食之名曰臘八粥二十四日除舍宇夜供糖餅棗菓祀竈除夕易門神桃符貼綵聯陳祀儀以修歲事選木聲洪者於次早震響以驚厲鬼



一縣屬兼產五穀一曰粟穀有黃白二種三月穀雨後  
耩種六月中旬吐穗八月秋分後成熟約一百五十  
日收穫一曰黍五月芒種時耩種六月下旬吐穗八  
月白露後成熟約一百餘日收穫一曰稷米有黎黑  
二種早晚同黍一曰稻五月上旬栽種七月中旬吐  
穗九月中旬成熟約一百二十日收穫一曰小麥二  
月春分時耩種五月初旬吐穗六月小暑後成熟約  
一百二十日收穫一曰大麥三月清明時耩種五月  
初旬吐穗六月初旬成熟約一百日收穫一曰蕎麥  
初伏耩種八月上旬出槩子九月上旬成熟約七十

日收穫一曰高糧有黑白紅三種三月下旬耩種六  
月中旬吐穗九月寒露前成熟約一百六十餘日一  
曰黃豆小滿時耩種七月中旬結角白露後成熟約  
一百二十日收穫一曰黑豆早晚同黃豆一曰葫蘆  
三月下旬耩種六月中旬出槩八月上旬成熟約一  
百二十日收穫大率廣俗民間常食以小米黍米爲  
主豆及雜糧佐之其大米飯小麥麩俗所珍惜以供  
賓祭之需非常食所用至蕎麥高糧則不堪久貯云  
一縣屬婚娶其行禮之序有三一曰換帖媒妁之言旣  
通婿家遣使齎帖至門財禮首飾羊酒食盒副焉女



家答帖回送書墨筆硯之類二日擇吉標梅伊邇婿家訊擇吉期往告婦家送表裏

細緞之類多寡不等婦家乃備

奩具婿家預爲新郎新婦製衣一日娶親吉期既屆婿家用迎女女使二人婦家亦用送女官客二人不奠雁不親迎新入紅袍紅裙紅帕罩面登輿就途至門婿俟於大門入拜堂進房行合巹禮奩具豐者先期送薄者卽夕行成婚以後次日新婦拜見舅姑行廟見禮合歡之三日新婦父遣轎馬車輛迎請新婿夫婦婿至婦家設筵款待婿拜見婦之父母次拜見婦黨諸親款留宴飲越九日送婿歸家名曰合堂至

一月之後母家遣車騎往迎女歸一月乃還名爲對月而婚禮畢矣

一縣屬喪禮死之三日門前掛白開弔鄉里見白群往奠焉嗣後弔無常期至斷七乃止作佛事延僧道誦經士庶之家往往有之近來紳士用浮圖者絕少遵家禮者頗多居喪亦有素食獨居服闋始出門宴客者孝服紳士麻庶民布而已葬無定期發引前數日下帖至期行銘旌禮送葬啟殯就塗用紙札爲幡導墳墓一年三祭清明舉新火也中元嘗新穀也十月朔送寒衣也



一祭禮士夫奉祖先神主時饗於寢春秋祭於墓每年以正月元旦供獻祖先中元薦時食歲終又供獻焉楮用金銀箔摺錠白楮刻錢紳士有用春分夏至秋分冬至祭於寢清明七月十五十月初一祭於墓有不用金楮者

一縣屬三月十七日遠近男女負戴香楮登千福山神祠拜禱祈嗣四月初十日闔邑士民獻戲設供祭享城隍凡三日二十八日祀東嶽神祠五月十三獻戲設供祭享關帝凡三日六月初六日社臺山祭賽龍神凡三日六月十三日水神堂祭九江聖母士女駢

集鄉村二三月春祈八九月秋報在神廟前扮樂享賽若夫二月初三日文昌聖誕諸生獻戲享祭則衣冠士林之會也

一物產

粟穀 黍 稷 稻 大麥 小麥 蕎麥 莜麥

莞豆 黃豆 黑豆 菜豆 蚕豆 菡豆 麻子

葛秫 俗名高糧幹  
葉如蕨而長 葫麻

菜屬

芥 芹 菲 茄 葱 蒜 蘿蔔 芫荽 蒿苳  
蔓菁 茗蓬 蘑菰 蕨菜 黃花 鹿尾 落藜



莒菜 白菜 卜菜 地椒

菓屬

杏 李 蒲桃 按邊地嚴寒不產珍菓又士民朴儉不尚花木是以土菓比諸他郡邑尤少焉

瓜屬

王瓜 西瓜 甜瓜 葫蘆 瓠子

花屬

葵 芍藥 菊 玉梅 茨梅 萱草 山丹  
十樣錦 石竹 珍珠 牽牛花 粉團 金盞

木屬

松柏 榆 柳 樺 槐 楊

草屬

葦 稗 艾 蒿 莠 茅 苜蓿

藥屬

黃柏 甘草 麻黃 大黃 柴胡 遠志 狼毒  
黃芩 防風 升麻 蒼朮 秦艽 草烏 知母  
地椒 斑毛 枸杞子 五味子 車前子 天仙  
子 益母草 地骨皮 甘遂

羽屬

雞鵝 鴨 雉 鴿 雀 燕 鵲 鳩 慈鳥



半翅 鵲 鴉 鴛鴦

毛屬

馬 牛 驢 騾 猪 羊 犬 猫 狐狸 兔

麇 狼 虎 田鼠

雜屬

油 蔴 石灰 白土 磁器 砂器



廣靈縣誌卷之五

賦役誌

賦者在古爲粟米之徵今之大糧是也役者在古爲力役之徵今之丁銀是也二者千古定規唐虞以來莫之能易也獨至廣邑弊竇叢生窮民有意外之苦查廣邑之地雖有上中下之分而糧不隨地每逢買賣之際富者乘人之急上地亦取輕糧貧者不得已而從之亦預爲遺糧典訟張本久之而地瘠糧重矣久之而地少糧多矣又久之而有糧無地矣前令有欲革此弊者復爲豪右所把持卒不得行至丁銀一

廣靈縣誌

卷五

賦役

欵康熙五十二年奉

旨直省人丁徵收錢糧但據康熙五十年丁冊定爲常額以後編審增益名爲盛世滋生人丁永不加賦

皇恩浩蕩亘古以來有如此者乎

今上御宇又慮無地有丁者爲窮民之累也復沛

皇恩允其丁歸地畝休哉真萬世不易之良法億兆有再生之慶矣他省丁銀盡歸地畝民困以蘇此地又阻於浮言僅歸其半此丁例戶例所以終難免也余力不從心無可奈何相幾而動於後來者有厚望焉誌

賦役



一田賦

原額民田共地四千三百八十六頃二十八畝七分五釐共該夏秋稅糧馬草脚價地畝驛糧銀八千八百四十二兩五錢五分八釐五毫零於順治五年內總督耿具

題部覆奉

旨蠲免無主荒地四十一頃六十四畝每畝所除不等共該除銀八十五兩六錢一分又於順治十三年內總督張具

題部覆奉

廣靈縣誌

卷五 賦役

二

旨蠲免無主荒地一千六百九十頃六十九畝每畝所除不等共該除銀三千三百九十兩二錢九分四釐九毫實在成熟地二千六百五十三頃九十五畝三分五釐內

上地一十五頃二十二畝每畝徵稅糧馬草三地畝

九驛糧一分五毫九絲九忽銀四分九釐五毫九絲九忽共銀

七十兩九錢二分三釐六毫七絲八忽

中地七十頃一十八畝一分每畝徵稅糧馬草二地

畝九驛糧一分一釐六絲六忽銀四分六絲六忽共銀二百十

八兩二分六釐四毫三纖



下地二千五百六十八頃五十五畝二分五釐每畝

徵稅糧馬草一分二釐七毫地畝九釐驛糧七釐四絲

三纖五沙八塵銀二分八釐七毫六絲七忽零共銀五千七

十七兩七錢三釐五毫二絲七忽零

原額山坡熟地二百八十三頃七十七畝四分每畝

徵牛犂銀八釐一毫五絲八微六纖共銀二百三十

一兩三錢三毫

順治十四十六兩年開墾清出隱種自首荒地四十二

頃六十八畝各徵不等共徵銀五十四兩五錢六分

三釐四毫零

廣靈縣誌

卷五 賦役

康熙二三兩年招民開墾荒地共地一百一頃八十二

畝各徵不等共徵銀二百八十兩五錢四分一毫零

康熙十六年清出隱漏額內無主舊荒民田下地三十

六頃七十九畝二分共徵銀七十二兩七錢三分三

釐一毫零

雍正六八兩年首墾額內民田一十九頃七十三畝二

釐共徵銀二十八兩二錢六釐一毫零

雍正十三年開墾額內民田中下山地一頃八畝五分

六釐六毫零各徵不等共銀二兩五分九釐三毫零

以上民田實在熟地二千一百三十九頃八十二畝



五分二釐六毫零各徵不等共折色銀五千九百六十四兩五分六釐零

原額士兵二百八十一名每名徵銀三兩五錢共徵銀九百八十三兩五錢

原係本色後每斗折銀七分

乾隆十年攤入地糧內丁徭銀一千一百四十兩八錢一額外共徵解部銀二十四兩九錢五分內匠價銀四兩九錢五分于仰請酌改匠價之輸徵以除隱累事案內攤入地徵收

賓興銀二十兩

通共額徵地丁錢糧並士兵匠價等銀九千二百五

十四兩三錢六釐零

一賞功地糧

大同管糧廳經徵坐落榆林村操賞沙下地二十三頃八畝坐落土巷口地三頃七十八畝每畝徵銀一分共銀二十六兩八錢六分係種地之戶自赴陽高分府衙門交納

起運

戶部項下夏秋稅糧馬草脚價地畝并節年開墾清出隱首等項共銀四千五百二十九兩二錢五分二釐零



工部項下胖襖銀一百一十七兩二錢

舊額存留項款奉文節年裁扣并裁官經費等項解部銀二千四百九兩九錢一分四釐八毫零

又舊額驛站節年奉裁項下抵解地丁正項銀並裁減夫馬工料銀共八百十五兩一錢八分六釐一毫零除馬匹加增草料銀一百七十五兩六錢八分外實該解部銀六百三十九兩五錢六釐一毫零

以上共起解銀七千六百九十五兩九錢七分二釐九毫零內除補給民壯荒缺工食銀一百兩添設更夫工食銀三十兩自設朔望行香等銀五兩六錢

關帝三代祭品銀二十兩八錢三分 先農壇祭品銀三兩五分 添設捕役工食銀三十六兩 孤貧冬衣布花銀四兩七錢一分九釐八毫 儒學俸銀四十八兩四錢八分 雩禮壇祭品銀三兩共除銀二百五十一兩六錢七分九釐八毫實該起解銀七千四百四十四兩二錢九分三釐九毫零

存留

存留官役俸食雜支照裁定銀一千四十九兩三錢八分二釐八毫

本縣



知縣俸銀四十五兩

門子二名每名工食六兩共銀一十二兩

馬快手八名每名工食六兩共銀四十八兩

皂隸十六名每名工食六兩共銀九十六兩

民壯二十二名每名工食七兩二錢共銀一百五十八兩四錢

捕役六名每名工食六兩共銀三十六兩

禁卒八名每名工食八兩共銀六十四兩

仵作二名每名工食六兩共銀一十二兩

更夫五名每名工食六兩共銀三十兩

傘扇夫三名每名工食六兩共銀一十八兩

庫子四名每名工食六兩共銀二十四兩

斗級四名每名工食六兩共銀二十四兩

轎夫四名每名工食六兩共銀二十四兩

舖兵十二名工食銀八十兩八錢

典史俸銀三十一兩五錢

各役工食共銀三十六兩

儒學

訓導俸銀四十兩

廩生二十名每名餼糧銀四兩共銀八十兩



門斗三名每名工食六兩共銀一十八兩

齋夫三名每名工食六兩共銀一十八兩

膳夫二名每名工食六兩六錢六分六釐五毫共銀  
十三兩三錢三分三釐

鄉飲酒禮銀八兩

文廟春秋二祭銀四十兩

關帝廟春秋並五月十三日三祭銀二十兩八錢二分  
啟聖名宦鄉賢祠祭祀銀十一兩一錢八分

風雲雷雨山川社稷八蜡等壇祭祀銀二十四兩

邑厲壇祭祀銀十二兩

廣靈縣誌

卷五

賦役

七

雩 壇祭祀銀三兩

朔望行香等銀五兩六錢

迎春神牛銀二兩

憲書紙價銀三兩

孤貧冬衣花布銀四兩七錢一分九釐八毫

二年一辦歲貢銀十二兩每年銀六兩

存留驛站實支銀七百三十五兩六錢八分內撥協

懷仁馬五匹夫二名半綉女村馬三匹夫一名半朔

州馬六匹夫三名本廠馬六匹夫三名歲支工料銀

七百一十五兩六錢八分官銀支二十兩



以上共存留銀一千七百八十五兩六分二釐八毫  
一火耗加一三徵收

應徵銀一千二百二兩四錢一分六釐二毫八絲七  
忽二末一先一沙四成五渺六埃九漠

一留支知縣養廉銀八百兩

一留支縣屬典史養廉銀六十兩

一留支大同府經歷司養廉銀八十兩

一留支春秋二季修理營房銀三十五兩六錢

一留支本縣繁費銀一百五十兩

一留支傾銷脚價銀九兩九錢二分一釐

一解 司銀六十六兩八錢九分五釐二毫八絲七  
忽二末一先一沙四成五渺六埃九漠

一稅務

房田稅契正額銀六兩七錢八分三釐九毫

盈餘銀無定額約五兩六七錢不等閏月酌加一二  
錢

商稅正額額銀一十二兩五錢三分三釐

盈餘銀無定額約銀一十四兩二錢四分零閏月約  
七八錢不等

畜稅正額銀七兩五錢五分四釐



盈餘銀無定額約銀一十兩三錢零閏月酌加三四錢不等

以上稅銀由縣起解

缸房課無定數每帖一張按年一兩二錢廣係山邑酒不能出外貨買賣者不過山市壺提罐沽辦納課銀自來無稅已經通稟

牙課無定數每帖一張課銀一兩二錢

當稅無定數每舖按年納課銀五兩

以上稅銀行戶自解府庫

鹽廣邑無官鹽店來自應州者名爲小鹽肩負驢馱

廣靈縣誌

卷五 賦役

九

至大青鹽間年一至係蒙古來賣無稅

烟葉原文每斤稅銀一分十六年詳准每斤止收三釐

梭廣邑民貧衣布不衣梭間有用者多取之境外故梭稅亦僅存其名

一倉儲

常平倉 乾隆十八年  
冬季冊報 共本息穀二萬一千六百五石

二斗七升六合一勺零

社倉 乾隆十八年  
冬季冊報 共本息穀一千一百三十四石一

升九合零



義倉

乾隆十八年  
冬季冊報

共本息穀三百一十九石六斗

以上各倉共積貯本息穀二萬三千五十八石八斗九升五合一勺若遇借放秋後照秋收分數定加免息穀還倉

戶口

舊管原額人丁三千三百六十九丁該均徭銀三千二百八十五兩三錢三分節次編審增出新丁並清出供丁四百六丁節次逃亡人丁一千一百四十五丁實在共人丁二千六百三十丁該均徭銀二千二百七十八兩三錢八分康熙元年編審寔行差人丁

廣靈縣誌

卷五

賦役

十

二千六百四十一丁該均徭銀二千二百八十八兩二錢二分康熙六年編審增出銀一兩六分康熙十一年編審增出銀五錢二分康熙十七年寔行差徭銀二千二百八十一兩八錢康熙五十二年欽奉

恩詔以康熙五十年審定丁冊定爲常額除盛世滋生人丁永不加賦外實在征賦人丁二千六百五十三丁中上則二百七十八丁每丁徵銀一兩四錢共徵銀三百八十九兩二錢中中則一千二百六十五丁每丁徵銀一兩共徵銀一千二百六十五兩



中下則七百一十二丁每丁徵銀六錢六分共徵銀  
四百六十九兩九錢二分

下上則二百八十四丁每丁徵銀四錢六分共徵銀  
一百三十兩六錢四分

下中則九十四丁每丁徵銀二錢六分共徵銀二十  
四兩四錢四分

下下則二十丁每丁徵銀一錢三分共徵銀二兩六  
錢

以上共征均徭銀二千二百八十一兩八錢  
一丁歸地畝

原額人丁徭銀二千二百八十一兩八錢乾隆十年  
詳奉

題允歸入地糧征收銀一千一百四十兩八錢隨丁辦納  
銀一千一百四十一兩計每地糧一兩應攤丁銀一  
錢六分四釐二毫一忽六末二先五沙八成五渺一  
埃



廣靈縣誌卷之六

政令誌

因時出治在地制宜或改絃而更張或循塗而守轍  
原不可膠柱鼓瑟也廣邑民俗樸古間流兇頑惟在  
上之人明禮義講律令勸農課桑勤宣

聖諭於以廣教化美風俗漸次滌除而已矣誌政令

一鄉約

順治九年頒行六諭臥碑行八旗直隸各省舉行鄉約  
于每月朔望日聚集公所宣講

孝順父母

尊敬長上

和睦鄉里

廣靈縣誌

卷六

政令

一

教訓子孫

各安生理

毋作非為

康熙九年頒

上諭十六條通行曉諭八旗佐領並直隸各省督撫轉行  
府州縣鄉村人等切寔遵行

敦孝弟以重人倫

篤宗族以昭雍睦

和鄉黨以息爭訟

重農桑以足衣食

尚節儉以惜財用

隆學校以端士習

黜異端以崇正學

講法律以儆愚頑

明禮義以厚風俗

務本業以定民志

訓子弟以禁非為

息誣告以全良善



誠窩逃以免株連

完錢糧以省催科

聯保甲以弭盜賊

解讐忿以重身命

雍正二年頒

御製聖諭廣訓萬言命直省督撫學臣轉行該地方文武

教職衙門曉諭軍民生童人等通行講讀

一臥碑

禮部題奉欽依刊立臥碑曉示生員

朝廷建立學校選取生員免其丁糧厚以廩餼設學院學道學官以教之各衙門官以禮相待全要養成賢才以供

廣靈縣誌

卷六

政令

二

朝廷之用諸生皆當上報

國恩下立人品所有教條開列於後

一生員之家父母賢智者子當受教父母愚魯或有非爲者子旣讀書明理當再三懇告使父母不陷於危亡

一生員之志當學爲忠臣清官書史所載忠清事跡務須互相講究凡利國愛民之事更宜留心

一生員居心忠厚正直讀書方有寔用出仕必作良吏若心術邪枉自殺其身常宜自省

一生員不可干求官長交結勢要希圖進身若果心



善德全上天知之必加以福

一生員當愛身忍性凡有司官衙門不可輕入卽有切已之事止許家人代告不許親與他人詞訟他人亦不許牽連生員作証

一爲學當尊敬先生若講說皆須誠心聽受如有未明從容再問毋妄行辯難爲師者當盡心教訓勿致怠惰

一軍民一切利病不許生員上書陳言如有一言建白以違制論黜革治罪

一生員不許糾黨多人立盟結社把持官府武斷鄉

廣靈縣誌

卷六

政令

三

曲所作文字不許妄行刊刻違者聽提調官治罪

碑禁

巡按山西等處兼管屯田監察御史爲永除晉民八

害事

一除收糧加耗之害凡州縣徵收錢糧不許明加暗扣需索火耗

一除簽派里民解銀之害凡一應錢糧奉

旨吏收官解不許私派小民幫貼使費

一除報民喂馬之害驛馬奉

旨官喂官養不許私派里民幫貼草料工食不許尅短



一除濫派雜差之害正額之外不許指陳別項名色  
科派里民

一除勒取借領之害在庫錢糧不許借公侵剋勒取  
里民甘結賠補

一除包攬錢糧之害一應錢糧令民自封投櫃不許  
衙役里長包攬花費致小民賠補

一除索取行戶之害不許買辦人役指陳官府賒取  
行戶貨物虧短價值

一除衙役擾民之害道府廳等官不許濫差衙役下  
鄉攪擾鄉民科索錢物

以上八條有犯官則飛章奏役則立斃杖下

一詳文

請豁絕戶錢糧詳文

邑令李煥斗

為電鑒災黎極苦詳豁絕戶錢糧以安民生事據士  
民某等稟稱廣靈地處極邊兼屬山隅地薄人稀歲  
前旱疫病災人民多斃以致戶虛地荒目今僅存殘  
喘本身差糧不能依期完納安能包賠絕戶錢糧若  
不泣陳詳豁恐招徠者復逃而久住者亦不能安業  
矣祈天詳豁民生得安為此上稟等情到縣據此  
職 看得廣靈疲癯山縣人戶稀少土產無出豐稔之



年半屬啼饑正供懸欠官斯土者補苴無術困累接踵况值連歲洊荒餓殍委於溝壑疫症流傳版圖半屬鬼錄而逃亡起食所在見告以致戶口虧缺因而滿目蒿萊現在餘生僅存肌骨實難代耕無主荒土豈能代納無主丁糧屢蒙憲檄着令招徠總爲丁糧所累恐土著者不能安其耕耘而逃亡者難以復還鄉井去歲若非 上臺仁慈請額

皇恩蠲賑茲邑幾成廢壤查定例內地地方有荒糧絕丁累民賠納者聽有司查實詳轉督撫應開豁者奏請開豁遵行在案值此奇災之後丁缺土荒

廣靈縣誌

卷六

政令

五

國課懸拖與其受叅罰於賦逋無出之日何如訴情形於起死回生之秋查今番編審共缺死逃人丁七百九十三丁各則不等共缺銀六百九十六兩八錢八分又續荒無主各色地畝共九百七十八頃該糧銀一千二百四十四兩六錢零

甲職

已會履畝查勘明

白實因人戶空虛以致荒土遍野今據士民

某某等

紛紛哀訴前來

職

若不據實請額是置民瘼於罔聞

悞封疆於俄頃豈職司守土者所忍出乎合無將亡

丁荒地糧銀具文詳懇

憲恩轉請具

題豁免以救目前子遺俟

甲職

竭力招徠勸懇陸續申



報復額則正賦亦不至終懸一轉移間而有造於地方匪淺鮮矣

編審缺額詳文

邑令李煥斗

照得廣靈土瘠民貧人戶稀少視雲鎮爲第一殘縣已非一日卑職蒞任二載多方張示苦心招徠借給牛種休養安息無論遠年逃民漸次復業還家者甚多惟是連年饑荒餓死者十之二三兼之時症大作病死者十之四五以致丁倒戶絕缺額甚多卑職向

已具文申詳在案茲者奉文五年編審職遵舊例查編十一月十七日齋戒誓神矢公矢慎順里順甲逐

戶嚴查推敲不遺餘力原額通縣共人丁若干各則不等共徵銀若干今查出老病死故人丁若干實在現存人丁若干各則不等共丁若干新增幼丁各則不等共丁若干除將新丁頂補死亡外實在現存若干各則不等徵銀若干仍該缺額丁七百九十三丁各則不等共缺銀六百九十六兩八錢擬合造冊隨文申報獨是編審大典屢奉憲臺申飾惟求加增以佐軍需職司守土方欲勉爲加增仰副憲令少稱厥職何期缺額如許之多無奈邊陲瘠壤凶疫洊罹閭巷蕭條村烟慘淡是以查審之下逃亡趨食者



固有餓斃病絕者更多是能爲者人而不能爲者天也今欲將缺額人丁責之現在包賠恐鳩形鵠面之餘生萬難納點鬼無人之虛徭且邊方丁差門則頗重每丁動至一兩以上本身丁役已自難支再欲令其包逃賠絕是一軀而剝百孔之瘡一羊而剝數層之皮必無完膚之理現今廣邑有一人而包納數兩者有一戶而包納數十兩者卑職目擊情形無不寒心此時而不據實大聲疾呼請 憲恩速爲拯救將來戶絕累甲甲絕累里縣事立不可問矣緣係編審缺額事理合據實呈請 憲臺俯念殘邑轉報咨

題開豁則國計民生均有攸賴矣

運米詳文

邑令李煥斗

爲泣陳運米大困懇 恩調劑通省公捐以甦偏累以安邊鄙事照得雲屬州縣疲困素稱甲於他屬自康熙二十年捐納例行貯米二十萬石於大同大有倉奉檄賑濟蒙古俱令大同州縣運送出殺虎口交卸雖奉有五百里內送米石皆於本地方州縣捐僱脚力不動正項之

部議然邊民困苦此役非一日矣今又奉文運米一萬石出口民間聞命無不咨嗟畏縮視爲害數查大同



到殺虎口二百四十餘里每運倉米一石需驢一頭  
費腳價四百餘文合計今一萬米數須費腳價四千  
餘金而廣靈一邑派運七百石應費腳價二百八十  
餘金矣此係

皇仁賑濟重務誰敢不竭蹶趨事勉力辦公竊念卑縣山  
陬瘠壤疲瘡苦邑兼值瀉饑之後十室九空子遺無  
幾此亦 憲臺所洞悉者今以目前二百八十餘金  
言之正供尚難措辦此費索於何孔將出之於民瘠  
土呼應不靈且干派累之禁出之於官窮員身家有  
限難爲無米之炊于情則掣肘於勢恐悞公未有官

累而民不累者又不獨一邑爲然也第思此米爲天  
下官員捐納之米今運送爲大同州縣獨任之責是  
天下捐員享其利大同州縣受其害事之失平莫甚  
於此今卽不能問之天下捐員亦當晉省州縣公捐  
運送少均勞逸方爲持平之道若因其貯於大同惟  
於大同州縣是問不惟目前苦樂失均此後尚有十  
餘萬石之米尚需四萬餘金之費亦惟於大同是問  
此無異驅羸犢而曳重車執嬰兒而舉烏獲幾何其  
不蹶覆也卷查康熙二十二年大兵經過僱覓車輛  
今年奉文修理城垣俱按各州縣衛所之大小錢糧



之多寡合省通融派捐公私允協在案今之運送總屬

天朝重務凡爲臣子誰敢推辭合無懇請 憲恩調劑俯念大同苦艱獨力難支不若衆擎易舉准照車輛城垣事例通省州縣衛所照糧公捐彙交大同縣僱募脚力運送完日造冊報 憲臺查核後有運送卽以爲例庶乎苦樂得均公務易結雲民始免飛輓之困邊吏亦無泛駕之憂不禁派累而派累自省一轉移間而荷 憲臺保全鴻慈於無旣矣

一告示

廣靈縣誌

卷六 政令

九

禁輕生示

邑令李煥斗

爲開曉愚民毋輕生命事照得廣邑地居邊界風氣悍勁無論男婦多賊性決躁每以纖芥反唇乾餓細故動則輕生或繫項自縊或服毒捐軀本縣蒞任未及一載種種見告聞之酸鼻言之傷心不思自縊人命若無威逼之實律無治罪之條爾等無知愚民輒謂一死可以洩忿於人孰知徒自送其性命無益於事或拋撇父母或丟下幼子或割結髮之妻或捨青年之婿死者入於窅冥不可復生生者依然團聚誰惜其死况聞佛家之言懸梁投水而殞命者陰府不



収不脫輪廻不享祭祀是生不得爲長年之人死作無所依歸之鬼豈不可憐豈不自悞爲此示諭各里各村人等知悉凡有識字者可將本縣此言說知愚夫愚婦務宜父誠其子兄誠其弟夫誠其妻明明白白互相曉諭古云救人一命勝造七級浮屠使愚夫愚婦曉然知捨命賴人空送性命無益於事則自然不爲輕生之行如有冤情何不鳴之於官以法責治洩此忿恨豈不美乎自示之後大家猛省代爲開曉保此天年安耕樂業毋蹈前轍自貽伊戚未便須知告示者

禁越訟示

邑令李煥斗

爲再飭健訟以保身家以安良善事竊照廣邑土瘠民貧風俗淳古守法循理者固多間有一種不安本分之徒喜於走空逞訟無論事大事小反眼卽興告訐立心專務詐枉傷財害命莫此爲甚自本縣下車以來再三申飭嚴禁此風稍稍寢息今歲徵有収登又蒙

皇恩免糧門無石壕之吏家有蟋蟀之風正爾民保養元氣寧家歡聚時也而刁訟者又漸作祇因本縣聽訟清明正直毫無遁情奸民無所售其欺詐且讞獄止



於逐責隨到隨結從不罰治一文留滯一事頑民不能快其夙忿謂此輕易便宜之訟無能遂其一網打盡之心則不可得志於本縣者或可得志於他屬也輒驀越上控他處告擾及已具告到縣不候審結復又越次別控此等伎倆實爲貧民大害而豈盛世所宜有不思往返牽率道塗奔走衙門差提使費所損實多止圖耗人之財而不知併耗已財止圖傾人之家而不知併傾已家蓋訟憑理斷豈容偏黨及至水落石出真情立見遭刑受罰而外所以破費資財覆敗身家者已噬臍無及矣卽使萬一僥倖取勝

本縣亦必研究根由覆申公道豈容頑讒逞狂害我良民當此連歲洊饑之後一文一粟何等艱貴爾民不思保重自愛悞聽訟師簧惑貪圖非分之倖獲舉有限之金銀而委之逝波則弄巧成拙誠愚之又愚者本縣憫爾半屬無知不能揆情度理輕聽旁言自罹法網不得不有此一番告誡不獨爲被害之家慮兼爲爾自身說法也爾卽頑石也該點頭痴迷也該惺悟爲此論八里士民人等知悉嗣後務要小心守分得忍且忍得耐且耐樂其妻孥保其和氣實自受無窮之福苟非萬不得已不許輕動一詞如有真正



冤抑具告本縣只宜靜聽審理纖毫不得枉屈或一  
審未明不妨再求覆審務求真情剖白涇渭立分而  
止本縣一片虛公熱腸不於此處用心讀書明理之  
謂何斷不肯悞聽訟棍貽他日不可追悔之憂也如  
敢仍前逞詐踏空驀越別控定行依律按治仍柳示  
一月以儆無良本縣矢心天日士民共見法在必行  
勿謂言之不早也特示

戒賭示

邑令李煥斗

爲嚴禁賭博以保身家以安民生事照得賭博之爲  
害宜淫誨盜傾家喪命皆起於此夫人而知之矣是  
以

廣靈縣誌

卷六 政令

三

新例獨嚴此條凡犯賭博不分旗下軍民人等旗下鞭  
一百民人責四十板各柳號兩個月出錢放梢之人  
柳號三個月夫人至柳號兩月三月雖屬鐵漢性命  
非其有矣而傷財傾家又何論焉興言及此可勿凜  
凜自懼哉廣邑雖貧而人心好賭屢經 上司行文  
申飭季取無賭甘結本縣亦不啻三令五申凡有發  
覺痛懲不少寬假而錮習不除近日猖狂尤甚無論  
城關鄉村日夜聚賭如某人某人本縣已經一一訪  
查于胸中拊心切齒指不勝屈但未經首發不便憑



空鑿究除目今發覺如王謨善陳萬斗道保子史光榮等盡法重處枷示外仍合出示嚴飭爲此示諭城關八里士民人等知悉各宜自保身命力改前轍勤力農畝多種幾畝地多收幾斗粟即可保養一家生命而賭博一途視之如火之焚身如坑之陷人遠避三舍以免此橫禍方爲良百姓上不敗祖父之家下不貽妻子之辱如敢仍前聚賭或被場中人告發或被旁人出首拿來審實盡法重處依律枷示不恕自後着令各鄉約里長庄頭不時稽查一有此事卽行出首如有容隱狗縱事發一體連坐但不許懷挾私

警捏造假情妄告以多事於地方如虛反坐治罪不宥慎之慎之特示

勸學示

邑令李煥斗

爲再行召募兒童習業以廣教化事照得廣邑民風樸魯有餘彬雅不足除書香之家頗識文字而外編氓子弟多不讀書不識鉛槧爲何物總因家貧不能延師教習以致所在目不識丁者甚多何以立身涉世本縣區區綿力不能廣敷教訓然立意未嘗不諄諄惓切望爾民稍通詩書之氣務臻淳雅之風已曾延請生員董榮城中設立義學召集遠近幼童十餘



人負笈習業雖不能遍行教導亦聊以示倡率也爾民稍可過活者各宜延師訓誨如實實力不能者卽宜赴董生員門下習讀稍開胸中茅塞本縣除給董生員俸穀而外仍量給紙筆以示鼓舞之意非敢市恩於民也爾民各宜勉力勿視此舉爲末務望之望之特示

節儉示

邑令李煥斗

爲禁飭奢侈珍重穀粟以保生聚事照得十八九年之饑饉餓殍載塗流離滿目可爲寒心揆厥由來皆因前此穀賤不甚值錢民間視此爲尋常不甚要緊

廣靈縣誌

卷六

政令

十四

之物以故積儲者少空虛者多一遇凶年束手待斃當此之時視升斗之粟勝於明珠十斛良以得之則生弗得則死是向來不甚要緊之物關於民之生死如此古人視穀粟重于金玉錦繡蓋金玉錦繡僅可以飾貌而不可以克腹若積穀則父子可以保聚夫妻不至流離一日積穀則保一家一日之生命一年積穀則保一家一年之生命廣靈今歲可稱豐登又值連年大創之後誰不知穀粟爲生命所關似無庸本縣諄諄告誡但恐有一種愚民見田間多收數斛粟便以富戶自居無論男女喜於鮮衣美食樂於豪



奢侈靡一切往來禮節甘心賤賣穀粟崇尚繁文及至倉虛廩竭又思借貸富戶以資贍養謂有次年禾稼之可償殊不知邊方之士災祲不常本縣蒞任五載屢見阻饑是以自春至秋日日有亢旱之憂時時有冰雹之慮今歲厚邀天幸安能保於將來語云防患於未然備荒於豐歲若到荒時而思補救亦已晚矣是用切切慮之除窩娼賭博屢經嚴飭外合行勸諭爲此示諭士民人等知悉趁此豐亨之年務宜切戒豪奢珍重穀粟多有積糴卽稍遇凶年亦可保聚一家骨肉不至流離失所古者三年耕而有一年

之積九年耕而有三年之蓄無非節省留餘以防不測所謂有備則無患也爾民自辦納正供而外切不可賤賣穀粟作爲無益之費免致不測之時呼天不應求人不能卽欲保聚一家骨肉豈可得哉望蠲望賑皆無益於事矣本縣蒞任旣久痾瘵愈切覩往思來不得不有此番告誡爲未雨綢繆之計迂腐中饒有苦心匪敢以虛文塗飾耳目也各宜猛省無貽後悔特示

勸民歌

邑令李煥斗

勸吾民

仔細詳

勤種地

早完糧



安故土

莫逃亡

愛兄弟

敬爹娘

守本分

勿竊攘

息爭訟

睦鄉黨

戒賭博

勿貪狼

思忍讓

勿逞強

教子弟

勿飄蕩

恤鰥寡

濟年荒

省浪費

保家方

聽余言

心勿忘

天福爾

降吉祥

官愛爾

免桁楊

若背斯言不省悟

難逃五刑與三章

大家黽勉相遵守

自然樂業永無疆

邑人李俊性不

孝凌虐其母一日牧牛山中為龍所攫有頃擲下骨肉如泥見者駭焉附此示警

預除螞蚱遺種以圖善後事

邑令郭

磊

廣靈縣誌

卷六

政令

去

竊惟今歲關外山上螞蚱躍入田中傷損穀苗雖即

時撲滅難保無遺種於地中為來年之害職生長中

州螞蚱之性素所深知察其遺種每在堅實之處如

地之頭起路之兩旁田中小道為多微物有知似因

耕犁不及不能傷其遺種且雖有雨雪其門孔不易

塗塞也今欲掘去其種恐不勝掘惟於春月冰消得

雨後螞蚱種已有生機宜查前歲螞蚱蕃多之處將

地之頭起路之兩傍並一切大小路一槩犁起荒塆

盡行動移螞蚱遺種一透春風定然不生更有請者

螞蚱與蝗原非一種螞蚱生於荒山因今年天氣過



暑山上草枯始跳入田中今除枯山不議外凡平日有草常生螞蚱之山就山麓下豫掘長溝俟夏至前後山上螞蚱生時卽雇人夫自上而下趕入溝內壓之以土不過數次死者十之七八矣至於種田之法近山傍溝之地種夏田螞蚱生時夏田已收傍夏田處種高糧高糧粗勁螞蚱不能傷傍高糧處種豆豆葉澁苦螞蚱不食傍豆處種黍黍苗微酸不如草味帶甘螞蚱亦不甚吃惟穀與草無異今歲螞蚱專傷穀苗其明驗也故必遠山近村之地始種穀縱能踰溝爲害而沿地俱畧有草亦不至傷穀矣設偶有疎

防致螞蚱入穀地則撲之之法亦與撲蝗不同蓋蝗飛一順而成羣而螞蚱則亂飛亂跳蝗飛甚高螞蚱跳不過一尺飛不過二尺宜用撲蝻之法畧加變通如南北地身則於地頭掘溝深二尺寬一尺五寸其土置之溝外臨撲時量地之寬窄定人數之多寡如南頭掘溝則從北頭撲起人持撲鞋木板樹條連撲帶趕從容追逐急則橫跳不前矣趕近溝丈餘時一齊緊撲緊趕擁入溝內恐其飛過溝外則先於溝外土上使人手持掃帚柳枝向溝內撲打螞蚱入溝遂用脚蹙土壓之又下溝內躑之致其不能復出而止



一撲之後必有跳入兩邊地內者第二回先於兩邊地內趕逐一番令其復回此地然後照前法撲逐不過三四次螞蚱必無遺類矣今年甲縣北土嶺螞蚱數日卽行淨盡者卽如此辦法也

稅務詳文節畧

邑令郭 磊

查得則例內上緞中緞等項其一百六十餘條緣甲縣地瘠民貧需用絕少雖有需用俱赴外境採買至土產酒菓等物亦緣處萬山中不能載出境外貨賣所有自來不曾收稅之處理合一併聲明蒙 批據詳已悉

禁哭節示

邑令郭 磊

爲嚴禁惡俗以迎瑞氣以承休嘉事照得履春露而怵惕履秋霜而悽愴原屬仁人孝子不容已之真情而愚夫愚婦動於不自知是以寒食中元等節有祭掃之舉斯固率土一轍者也惟雲郡獨有哭節之俗甚至佳時令節如上元之次日職官吉服稱慶士民具酒殺共鬧花燈獨令婦人呼天號泣於通衢風俗凶陋鬼怪至此而極良由三代以還禮文莫講炎宋之世司馬程朱推明憲典山後諸州又界荒服是以禮俗頗異關內至哭節一事定因石晉以後斯地日



事爭戰丁男多陣亡獨有婦人感時悲傷而陣亡之後既無靈柩又無墳墓不得不出大門望戰場而悲號此哭節所由來也相沿既久遂以爲哭先人夫哭先人何以男子不哭而婦人獨哭哉在當日死亡相繼自應耳耳目今太平百年室家相聚歲時自有祭掃定規而乃仍此惡俗不祥孰甚焉今與士民約紳衿之家除自行禁止外仍勸諭鄉民令其速行禁止鄉民亦各自禁止以共樂泰階惡俗一去行見和氣致祥人丁日盛大有頻書五福並臻關外氣象爲之一新矣特諭

禁異姓亂宗示

邑令郭 磊

照得律載乞養異姓爲義子以亂宗族者杖六十若以子與人爲嗣者罪同其子歸宗又其遺棄小兒三歲以下雖異姓仍聽收養卽從其姓但不得以無子遂立爲嗣又例載若義男爲所後之親喜悅者聽其相爲依倚不許繼子並本生父母用計逼逐仍酌分給財產又乞養異姓義子有情願歸宗者不許將分得財產攜回本宗其收養三歲以下遺棄之小兒仍依律卽從其姓但不得以無子遂立爲嗣仍酌分給財產俱不必勒令歸宗等語蓋乞養之子收養之子



俱可爲義子而收留三歲以下小兒不自知其姓故可從收養者之姓至乞養之子自有本姓故不許改姓也再稽之經典春秋有莒人滅郕之文考之傳文非真滅其國族也郕君無子莒君以莒國之子爲郕君之子而襲其國孔子遂書以滅耳此卽異姓亂宗之事也按之律例考之經傳一一燦列乃關外之俗無論士夫平民養螟蛉者所在多有無子者固養以爲嗣卽有子者亦多養以爲子或娶再醮之婦帶入者一云帶死卽改姓視爲己子鄉黨習爲故然卽同胞兄弟以及胞姪不得過而問焉惡陋之習牢不可

破殊可痛恨良由三代以前關外旣難以詳究石晉以降又所難言五代八姓由來久矣至今舊習難移爲婦人者異姓相聚妯娌本係路人故已旣無子產業寧歸他姓而不以與妯娌之子男夫義理不明婦言是用故祖宗之傳流亦寧付他人而不以給兄弟之子此乞養異姓所以日多也婦人本不足責爲男夫者縱不知猶子之義獨不思若之姪卽若父之孫乎再遠亦若高曾之裔乎卽極遠非始祖之後乎木本水源總屬一體如以異姓爲嗣子復生子孫復生孫異姓之子孫又各乞養異姓勢必至一姓之室雜



姓並居之一姓之兆雜姓亂葬之一姓之龕雜姓共  
列之生則呼父呼兒情愛甚密清夜回想有何聯屬  
死而有知更相對無色也如云爲身後祭葬計古人  
云子孫之精神卽祖考之精神子孫之精神聚祖考  
之精神亦聚以異姓爲嗣恐張姓子孫之精神聚李  
姓祖宗之精神未必聚也又云祖宗葬吉地者子孫  
蒙其福以異姓爲嗣恐李姓之祖宗葬吉地張姓之  
子孫未必蒙福原非一脉也言念及此情意不灰心  
思不淡者有是理乎今與爾士民約自出示之後乞  
養收養他人之子爲義勇者聽斷不許乞養他人之  
子改從己姓立以爲嗣收養之子雖從己姓亦不許  
立以爲嗣違者照律究治其已往者本縣亦不追究  
俟告發時照律聽斷特示

一卹儒倉記

邑令郭 磊

余爲諸生時值歲荒邑侯某散賑村中余見紳士之  
貧者匍匐長吏之前哀乞胥役之側或幸憐而得升  
斗或遭訶斥而無獲旁觀寔覺惡然因思常平義社  
等倉

國家足食之政詳且盡矣守土者獨不可彷彿此意以卹  
士子之貧養士子之氣乎乾隆丁卯出宰廣靈欲遂



初心因差務頻仍公私告匱未遑也逮甲戌歲大熟  
邑之紳士請勸捐修邑誌書成仍有餘財余恍然曰  
可以成卹儒素志矣余捐穀若干益以修誌餘財得  
穀若干商之同人無不首肯遂將此穀另注名爲卹  
儒倉編爲條約並原捐人姓名以所捐多寡爲先後  
附列於左

### 條約

一倉穀不掌於縣主而掌於學師擇生監中端方才  
幹殷寔者分董其事收放數目亦牒知縣主  
一收穀出息照社倉之法出穀催穀門斗供役每次

每人給工食穀一倉石

一領時用連名領子收時互相催交

一荒年不許富者支領豐年五六月間秋收有望出

陳易新聽董事之人與學師商度

一此倉專爲寒士而設若縣倉出放時各生照舊借

領原非領此倉者不許再領縣倉也

一賭博刁訟有玷行止者不給

一領後死亡貧窮堪憐者免還

掌管儒學掌印訓導周天申

董事



韓士傑

生

員仝懋官

杜璋

監

生郭遜

一勸備荒卹族條約

邑令郭磊

蓋聞天下者一家之積也家知仁讓則雍和之俗成  
家有儲蓄則阜財之風著今

國家設常平等倉猶恐未足更加以社倉義倉其法亦  
詳且盡矣夫

朝廷之良法美意既足以禦凶荒使家有儲蓄不益有備

廣靈縣誌

卷六 政令

三

無患乎余自童子時讀大學衍義卽慕朱子社倉法  
向父老請曰此法若行於族內亦備荒良策也後值  
歲荒時吾曾祖祖父猶存家事頗豐出粟以賑闔族  
之人無流離失所者數十年久之族姓日繁吾家食  
指日增吾祖官單懷吾父官石埭又各有賠墊之苦  
兼以丁未後屢遭變故產業漸凋迨庚戌大荒余以  
是年秉鐸宜陽目覩族人之饑寒欲救無術也丁巳  
歲余成進士解組還里訪族人每不遇僉曰某因歲  
荒他適矣某某就食他方矣聞而傷之益思做社倉  
法行之族中次年大稔遂約族中同志數人各量力



捐輸名爲卹族倉立爲條約行之數年倉穀頗裕除  
荒年賑濟外又辦理婚葬及卹族院等事而倉仍有  
餘蓄余自乙丑宦遊於外今已十餘年中州屢荒而  
族人不至流亡知此倉之果有裨益也廣靈雖僻處  
萬山中其成族者多或數百戶少亦不下數十戶其  
中貧富相參苟富者於貧族勿膜外視之貧者於富  
者勿爲望外之求做吾法而行之則卹族卽所以睦  
族將家有儲蓄而成阜財之世久之旣富而穀亦家  
知仁讓而成雍和之俗矣謹將行之旣效者條約詳  
列於左

一豐年三月初旬出倉穀十分之三散於族內之殷  
實者如穀一石時價銀五錢俟秋收時卽用銀五  
錢糴新穀若干入倉春穀貴秋穀賤富者代微勞  
不必出息而倉自裕若秋收甚薄穀價騰貴亦止  
照原價五錢收穀不許勒令還一石之數

一半荒之年分極貧次貧並計各家口數酌量賑濟  
極貧九月放賑起次年四月止次貧十一月放賑  
起次年三月止

一大荒之年於八月內請族長並高年之人齊集家  
廟通籌族中之人極貧次貧不足分爲三等計其



戶數口數並倉中穀石數目以便酌定散賑數目  
極貧八月放賑起次年四月止次貧九月放賑起  
次年三月止不足十月放賑起次年二月止其每  
月所出之穀不能還倉者聽於豐年完納留作倉  
本

一族內鰥寡孤獨廢疾之人雖豐年亦難存活其鼠  
耗斗面倉底浮餘之穀另注一倉以爲此項之用  
一家貧患病者量加周濟

一貧不能娶者酌賣倉穀爲助

一死無棺者酌賣倉穀爲助老者從厚少者從薄節

婦孝子另議

一擇族中貧戶年力精壯者二人爲倉吏司出納每  
歲給工食若干

一遇豐年公議捐輸

一倉穀原以備荒不許徇情轉借違者家廟議處

一倉穀原以濟貧有家本不貧恃強硬領者家廟議  
處

一凡席片鋪墊總在倉穀內買備不許派食穀貧族  
備辦

禁投匿名文書告人罪示

邑令郭 磊



律

凡投貼隱匿已姓名文書告言人罪者絞監候雖見

者即燒燬若不燒將送入官司者杖八十官司受而

為理者杖一百被告言者雖有不坐若於方能連人

文書捉獲解官者官給銀一十兩充賞律註若詭寫

帖計人陰私陷人或空紙用印虛捏他人文書買囑

舖兵遞送詐以他人姓名註附木牌進入內府不銷

名字陷人得罪者皆以此律絞箋釋凡與人有仇不指實告官却隱匿自己姓名或詭

寫他人姓名許人隱私過惡或投擲官府衙門或黏

貼通衢要路使人不可究詰故坐以監候絞雖實亦

坐見者即便燒燬不許傳示違者問不應答罪若將

送入官司則姦言得達於上矣故杖八十官司受而

為之聽理則姦言得行於上矣故杖一百雖其所投

之事皆有指實而被告言之人不坐若於將投未投

之時有能連人與文書捉獲者官給賞銀一十兩

例凡凶惡之徒不知國家事務捏造悖謬言詞投貼匿名

揭帖者將投貼之人及知而不首者具擬絞立決旁

人出首者授以官職奴僕出首者開戶

凡布散匿名揭帖及投遞部院衙門者俱不准行仍

將投遞之人拏送刑部照例治罪不行拏送者交該

部議處接受揭帖具題及審理者革職



勸諭

大人因爲爾等無知之徒或鄉曲偶有微嫌或遇公庭積有夙忿或挾詐未遂刁訟不行因有披拾浮詞恣其詆毀將無作有指假爲真甚至撰成歌曲刷貼通衢汚人名節雖上而官長亦肆謗訕道路之人真偽莫辨遂以爲新聞傳播貽害無窮總由未明律例不知情罪重大以致無所顧忌所以如今每宣講

聖諭後又講匿名揭帖一條你們細想律例上明明載着造作匿名文書的人雖是實話也問絞罪被告被貼之人並不究問你們欲要造匿名文書害人縱然不

顧義理難道也不怕利害麼況且你們造匿名文書自己先得個死罪了縱然與其人無仇未必是殺身之仇一做匿名文書自己先得個殺身之罪至你所欲害之人官府並不究問徒自吃虧了若是圖訐人陰私不知人家真有其事你知道他人自然也知道何必訐他若是虛的你雖訐出寃於其人何害明有王法幽有鬼神雖一時倖免官法冥誅定不能免你們清夜捫心此事如何做得更有不知

國家事務捏造悖謬言詞文章或從而抄寫傳播此等凶惡之徒王法斷然不宥如今



大人愛惜你們恐怕你們不知法律輕蹈殺身之禍特  
命地方官於朔望宣講

聖諭後卽將投匿名文書告人罪一條解說一番細細開  
導你們實是保全你們的意思你們要細心改行自  
顧身命勿負

大人愛惜你們的美意保全你們的苦心大家同享太  
平豈不好麼



廣靈縣誌卷之七

秩官誌

廣靈置邑始自後唐前後官斯土者歷年已久欲考其姓氏故牒散佚無有存者再稽之史冊亦紀載缺如遂使前人官爵里居與金銷石泐同泯沒而不傳於後舊誌秩官自前明始今承其舊而誌之至守備一員

國初奉裁前誌未詳其姓氏教諭一員雖已奉裁而官牒既存仍備載之非畧於此而詳於彼也誌秩官

知縣

廣靈縣誌

卷七 秩官

明

葉時茂

洪武十六年知縣蒞任之初修理城池人民效力勞而不怨祀名宦祠

王敏

永樂年任

劉銓

正統年任

孫敬

舉人真定人正統五年任

侯真

正統十年任

劉慶

景泰年任

王春

歲貢東光人天順年任

桂林

歲貢石埭人天順年知縣事蠲煩滌苛一意蘇息秋多方儲粟及春以貸民之貧不任耕者民以此德之



去之日攀留有失聲者載府誌

王志 歲貢大興人 天順八年任

王用 歲貢海鹽人 成化四年任

宋徵 舉人陽谷人 成化六年任

張貴 歲貢吳橋人 成化十四年任

曾錯 舉人太和人 成化二十三年任

程觀 舉人甯陽人 弘治元年任

孟繼先

歲貢沙河人弘治中知縣事到任首以課農興學為

務平催科清訟獄不苛不擾民甚便之重築城垣不

歛民財設法措置城郭樓櫓煥然一新祀名宦祠

劉大甯 舉人完縣人 弘治十三年任

潘瑞 歲貢新鄉人 弘治十五年任

沈欽 舉人錢塘人 弘治十六年任

于通 歲貢文登人 弘治十七年任

廣靈縣誌 卷七 秩官

王龍 舉人太安人 正德四年任

田畊 舉人澄城人 正德七年任

陳諫 長垣人 正德十一年任

郭禎 舉人弘農人 正德十三年任

朱鑑 舉人順天人 正德十六年任

黃鑒 歲貢汲縣人 嘉靖二年任

郝綦 舉人綏德人 嘉靖五年任

翁志真 歲貢蒙陰人 嘉靖七年任

劉永阜 監生任邱人 嘉靖十四年任

李貢 歲貢大蒿衛人 嘉靖十六年任

呂霆 舉人獻縣人 嘉靖十七年任

趙昂 歲貢行唐縣人 嘉靖二十年任

吳尙賢 歲貢德州人 嘉靖二十二年任

侯瀾 監生良鄉人 嘉靖二十三年任

滕璧 歲貢武邑人 嘉靖二十四年任

魯師曾 舉人興平人 嘉靖二十八年任

胡欽 舉人騰鏤衛人 嘉靖三十三年任

孫武臣 歲貢平度人 嘉靖三十八年任

馬應明 歲貢高苑人 嘉靖四十四年任

張理 歲貢保安人 嘉靖四十五年任



馬承志

歲貢南和人  
隆慶元年任

宋

賓

歲貢良鄉人  
隆慶二年任

韓希寵

舉人安陽人隆慶中知縣事剔弊除奸矜鰥恤寡吏畏其威民懷其德祀名宦祠

喬密

字汝登舉人陝西同州人隆慶中知縣事興學校卹

寡熒墾荒田鋤豪右操守清廉奉檄甃城殫力董役

功成踰百年壯麗如初後陞霸州刺史祀名宦祠

吳過

舉人寧夏人  
萬歷五年任

劉審問

恩貢昌樂人  
萬歷九年任

王衡

舉人扶風人萬  
歷十一年任

史應奎

舉人韓城人萬  
歷十六年任

廣靈縣誌

卷七

秩官

三

雷大道

舉人朝邑人萬  
歷二十年任

高份

舉人陳留人萬  
歷二十三年任

杜一奇

選貢澄城人萬  
歷二十六年任

尤翹

田思惠

選貢漢  
州人

鄭簡

舉人獻  
縣人

李馥寰

姜一鵠

貢生齊  
河人

李時暢

選貢曲  
陽人

包相

舉人恩  
縣人

張時遇

貢生臨  
城人

路時中

劉裔

會副朝  
邑人

武功成

選貢贊  
黃縣人

李振升

選貢元  
氏人

王璞

選貢長  
垣人

戴君恩

遼東  
人

國朝



孔際魁

歲貢保定人  
順治元年任

杜汝淳

歲貢永年縣人順治三年知縣事賦性耿介剛方不阿堅守清操冰蘖自茹卒于官祀名宦祠

范發愚

進士河南人順治五年知縣事姜逆叛據大同渾源逆黨朱廷佐糾集千餘人剽掠庄堡邑姦民李青許登旺等勾連賊眾攻圍縣城發愚以大義勸諭士民晝夜捍禦與城存亡仍調四鄉義民救援後潛絕壯士赴英王麾下請兵勦滅之賊遂平又築堤瀦水城

廣靈縣誌

卷七

秩官

四

關永無衝崩之患丁憂去任士民謳思後歷陞江西道祀名宦祠

蕭咏韶

恩貢江南鳳陽人順治八年知縣事課士除姦豁荒救敝吏民稱之

劉竟達

恩貢直隸無極人  
順治十年任

石篤生

舉人山東長山人順治中知縣事革弊釐姦民安政舉秩滿陞廣西西隆知州

焦恒馨



雞澤人康熙初知縣事安集逃民地方起色偶以註  
誤左遷士民惜之祀名宦祠

朱 夔

進士嘉興人康熙九年知縣事秉政慈良愛民如子  
左遷去任人共懷思祀名宦祠

張鳴珂

舉人陝西同州人康熙十一年知縣事政簡刑清士

民咸感陞河間府景州知州

高正儀

進士湖廣公安縣人康熙十七年任李煥斗有傳

江留篇

舉人廣東吉陽縣人康熙二十七年任王懋德進士湖廣武昌縣人康熙三十年任

廣靈縣誌

卷七 秩官

五

劉名史

貢生順天宛平縣人康熙三十三年任線 榧 滿洲人康熙

任一熊

吏員順天大興人康熙四十四年任高汝斐副貢山東登州府人康熙五十五年任

鄧正吉

舉人廣東廣州府人重修文廟補造祭器康熙五十

六年任

杜 坦

舉人陝西西安府三原縣人雍正二年任城神廟城

樓書院多所修理

趙必訖

貢生江南涇縣人雍正六年任田 芑舉人陝西華陰縣人雍正七年任

韓 銓

進士直隸文安縣人雍正九年任



孫惠棠

舉人浙江嘉善縣人乾隆六年任共推謹廉

郭磊 進士河南商邱縣人乾隆十二年任

教諭

明

方俊 歲貢密縣人景泰年任

胡鎔 歲貢正統十一年任

十昇 歲貢武強人天順八年任

魏理 歲貢武強人成化年任

康定 歲貢新縣人成化十二年任

金紳 歲貢平谷人宏治五年任

范鼎 歲貢曲梁人宏治八年任

張紹宗 歲貢鞏昌人正德十三年任

郭卓倫 歲貢安東人正德十六年任

郭源 歲貢永寧人嘉靖六年任

廣靈縣誌

卷七 秩官

六

梁雲 舉人齊河人嘉靖十二年任

韓濟 歲貢澤州人嘉靖十四年任

傅朝用 歲貢武功人嘉靖二十年任

趙達 歲貢昌平人嘉靖二十九年任

田文通 歲貢霸州人嘉靖三十年任

萬鏗 歲貢保安人嘉靖四十年任

陳助 歲貢慶陽人嘉靖四十二年任

張獻 歲貢霸州人嘉靖四十四年任

馬斯才 舉人襄城人隆慶元年任

岳曇 歲貢齊河人隆慶三年任

王延舉 歲貢同州人隆慶五年任

胡習詩 歲貢紫陽人萬曆元年任

韓國晏 歲貢猗氏人萬曆四年任

張拱宿 歲貢太原人萬曆六年任

宋可大 歲貢昌黎人萬曆七年任

黃鉞 歲貢霍州人萬曆十一年任

鄭臣 歲貢平陽人萬曆十五年任

王邦麒 舉人平陽人萬曆十九年任

王好禮 選貢繁峙人萬曆二十二年任

李國士 歲貢萬曆二十四年任



李 歲貢澤陽人萬 歷二十八年任 李光耀 歲貢興縣人萬 歷三十年任

馬騰蛟 歲貢稷山人 惠萬錫 歲貢清澗人

牛大行 歲貢靈石人 周紹庭 歲貢慶都人

張問行 遼東人

國朝

雷景暉 歲貢陽曲縣人 順治四年任 王家棟 拔貢沁州人 順治六年任

符 罔 歲貢翟成人康 熙十五年任 李修高 歲貢解州人康 熙十七年任

任之琇 副榜河津人康 熙二十一年任 黃元第

張淑修 拔貢五臺縣人 張作興 歲貢代州人康 熙四十八年任

梁洲

廣靈縣誌

卷七 秩官

七

歲貢汾州府介休人重修文廟整理學規康熙五十

七年任

周 學 舉人太原府榆次人 喬 菁 歲貢祁縣人應州 訓導雍正五年署任

葉 澄

舉人絳州聞喜縣人文行兼優啟廸有方雍正六年

任

馮 情 舉人忻州靜樂縣人乾 隆十三年任十五年裁

訓導

明

王 景 歲貢獲鹿人 正統十年任 邵 忠 歲貢封邱人 天順八年任



金 禎 歲貢黃巖人

喬 俊 舉人成化元年任

孫 泰 歲貢相鄉人

任 賢 歲貢封邱人

張 貴 歲貢元山人

趙廷松 歲貢雞澤人

王希謙 歲貢河間人

安思忠 歲貢太安人

譚廷偉 歲貢河曲人

王 博 歲貢人

王 沂 歲貢唐縣人

梁應文 歲貢萬歷人

徐 垣 歲貢陵川人

李九思 歲貢人

閔時制 歲貢壽陽人

張大養 歲貢絳州人

魏 格 歲貢代州人

楊宏祖 歲貢襄陵人

李澤民 歲貢繁峙人

李 琦 歲貢豐人

董 鑑 舉人長清人

江 謙 歲貢霸州人

孫 炳 歲貢清河人

李 景 歲貢永平人

鄧 健 歲貢順天人

車守湯 歲貢曲陽人

周志道 歲貢南宮人

王 詔 歲貢文水人

李 品 歲貢長治人

樂以忠 歲貢乾州人

李廷良 歲貢靈石人

趙 琛 歲貢代州人

白 清 歲貢人

衛朝縉 歲貢浮山人

賀逢昌 歲貢崞縣人

郭光儀 歲貢沁州人

段國燦 歲貢岳陽人

廣靈縣誌

卷七 秩官

國朝



劉介社 歲貢高平縣人 康熙二十一年任 趙翼明

王昌 賈珖

馬烈 王聘

武運肇 歲貢汾陽人 康熙五十八年任 王懷德 歲貢威遠衛人 雍正三年任

楊凌斗

歲貢絳州稷山縣人 人品端方 學問優長 雍正八年

任

支萃 歲貢稷山人 乾隆六年任 陸紹光 歲貢平定州人 乾隆十一年任

周天申 歲貢榆社人 乾隆十三年到任

典史

廣靈縣誌

卷七 秩官

明

高輝 洪武年任 趙自立 洪武年任

郝福 新縣人 正統年任 李鏜 天順二年任

張輝 武功人 成化年任 許鑑 安州人 成化年任

劉貴 萊陽人 弘治年任 孫嵩 邢臺人 弘治年任

郝奎 弘治年任 李璽 曹州人 正德年任

譚琰 平原人 正德年任 馬暄 武清人

顏世全 洛陽人 王鴻 武功人 嘉靖年任

楊自然 富平人 嘉靖年任 王統 三原人 嘉靖年任

范自邇 甯津人 隆慶年任 秦熙 華州人 萬曆元年任



宋汝楠 吳橋人 萬曆六年任

蕭勇湖 蘄州人 萬曆十年任

馬君寶

莫惟康

許成名 當塗人

馮國

李永康

周大賚

趙思敬

張九官

國朝

秦佐 吏員浙江山陰縣 順治二年任

張暉 吏員順天大興 順治九年任

姜登龍 吏員直隸無極縣 順治十一年任

張宗遺 吏員陝西富平縣人 順治十三年任 陞桐鄉巡檢

廣靈縣誌

卷七 秩官

韓開 吏員陝西耀州人 康熙十年任 卒于官

章順節 吏員浙江會稽縣 康熙十八年任

李素 吏員山東陽信縣人 康熙二十九年任

葛士元 吏員關東錦縣人 康熙五十一年任

楊新命 吏員直隸元成縣人 康熙四十九年任

沈涓 吏員浙江山陰縣人 康熙五十一年任

沈成瑞 吏員河南舞陽縣 雍正七年任

汪祖禔 供事安徽旌德縣 乾隆六年任

程誼 監生河南武安縣 乾隆十二年任

周圻 吏員浙江山陰縣 乾隆十七年任



武職 教場武備附

守備 順治 年以酌定  
煩簡一案奉裁

把總 屬靈邱路  
分員守汛

國朝

劉智山 將材陽  
和衛人

孫雯瑞 將材永平府  
山海衛人

曾士德 康熙三十  
五年任

張國銳 行伍順天人  
康熙四十年任

祁朝福 行伍大同人  
康熙五十年任

馬宗援 行伍大同人  
雍正十三年署任

任敷臣 行伍陽曲人  
雍正十年任

劉基 行伍平魯人  
乾隆九年任

教場

在城西遺址尚存共地一頃零五畝

廣靈縣誌

卷七 秩官

十一

草場

在城西南隅

武備

頭號炮 重三百餘  
斤者三位

二號炮 重九十餘  
斤者十位

三號炮 重三十餘  
斤者十五位

餘久無存



廣靈縣誌卷之八

選舉誌

選舉之途自古有之廣邑之可考者則自明始

本朝登禮闈者缺如膺鄉荐者四人貢生例監亦少於他邑予欲撰小引無處着筆及閱雲中誌見其編於卷首者則有徵辟遐矣於焉帖括甲乙而外明經附列彙闕征途維芑維棫濟濟譽髦並楨王國數語頗近古雅爰錄之以誌選舉

進士

明

廣靈縣誌

卷八

選舉

正統丙辰科周旋榜

王尚文

有傳

天順甲申科彭教榜

聶友良

延慶州籍字益之天順間由進士授縣知縣擢

御史出監大同軍儲勾稽精詳宿弊一清還朝疏

陳邊政十事胥中機宜再按畿輔屬吏中有克自

卓立善政及民者薦之惟恐不速至貪墨軟熟雖

權勢子弟弗恕也後陞浙江按察司副使卒祀忠

義祠



嘉靖乙丑科龔用卿榜

張舜源

舉人

明

永樂辛卯科

齊汝舟

任浦城縣知縣

永樂甲午科

董魁

宣德乙卯科

墨芸

任封

廣靈縣誌

卷八 選舉

二

正統戊午科

王尚文

有傳

齊韶

官至南京工部侍郎

景泰癸酉科

齊章

任安塞縣教諭

天順壬午科

聶友良

順天榜詳見進士

宏治戊午科

劉瑩

嘉靖戊子科

張順源



國朝

康熙壬午科

邱齊衡

初任竹溪縣知縣所在有惠政解組歸後以德望舉鄉飲大賓

雍正癸卯科

韓國瓚

初任靜海令嘗遇山東流民孤女李氏于道收養之為擇佳偶資其婚嫁時稱義舉後任獲鹿固安又以才能出眾題陞霸州知州所著有壺源詩草

廣靈縣誌

卷八 選舉

三

水利論

雍正巳酉科

董暄

乾隆壬戌科會試明通榜任淳縣教諭

乾隆辛酉科

王振緒 乾隆壬戌科會試明通榜任淳縣教諭

貢生

明

趙祺

任廣東道監察御史

王惟一

任教諭

王統

任昌平縣教諭

李文煥

任吳堡縣知縣

王莊

任遵化衛經歷陞汝州同知

周簠

任開平衛經歷



廣靈縣誌

卷八 選舉

李協中 任完縣主簿

王惟新 任四川道監察御史

曹友諒 任徽州府通判

李士廉 任青苑縣丞

王睿 未仕

劉宗 未仕

楊璉 任昌平縣知縣

王惟然 任涇州吏目

宋賢 任金縣知縣

馮演 未仕

李守政 隆慶年拔貢任魚臺縣主簿

李守宜 任洪洞縣教諭

李景 任高郵州判官陞西華縣知縣死難贈光祿寺寺丞有傳

李永年 未仕

白冕 任浙江台州寧海縣鐵場教諭

白塗 任光祿寺署丞陞臨洮府通判

白汝清 任竹谿縣知縣

白汝淪 任平鄉縣知縣

白汝澄 任高唐州同知陞代府審理

白琬 任胙城縣教諭

白希曾 任河南陽武縣主簿陞萊州府經歷

白希閔 任陝西鞏昌府西寧衛通判

王儒 未仕

王三接 任陝西韓城縣丞

王明 任平陽府教諭

王五美 任河津縣教諭

許敬中 未仕

李挺 萬曆丙午副榜

來賓 任山東冠縣主簿

董宗顯 任山東冠縣知縣

梁才 授七品冠帶

王璽 任引禮舍人

張友信 任秦州吏目

王倫 任滁州倉大使

楊憲 未仕

李成 未仕

王暄 未仕

劉智 未仕

朱孔陽 未仕



趙文智 任鴻臚寺序班

董英 仕未

任志 任景州州判

鄧華 任山東壽光縣主簿

安泰 任固安縣縣丞

蘭瑞 仕未

趙文華 任河南永寧縣知縣

王士達 任處州照磨

來士廉 任苑馬監正

董莒 任河南永寧縣縣丞

金鳴 任壽張縣主簿

王尚學 任處州府知事

田賦 任三水縣縣丞

張達 仕未

許俊 任雲南知事

田貢 任安定縣訓導

劉棋 任樂城縣主簿

王玪 任盧氏縣訓導

李九臯 任新鄉縣主簿

張鸞 仕未

廣靈縣誌

卷八 選舉

董章 任眉縣知縣

陳伯龍 仕未

金居義 任歸德府同知

路雲 任訓導

齊維縉 任隴州訓導

馬珊 仕未

任宗 任商水縣知縣

張維儒 任臨漳縣縣丞

董綸 任陝西行都司斷事

趙昌齡 任封邱縣縣丞

劉保乂 任寧夏衛訓導

李瑞 任順義縣訓導

仝鎮 仕未

王世美 任濟源縣縣丞

馬世祿 任南京北城兵馬司陞河南同知

曹志俸 任朝邑縣縣丞

郭朝 任縣主簿

李守時 任高苑縣主簿

梁桂 任靈臺縣主簿

王四隣 任大城縣主簿



趙鑾 未仕

焦經 未仕

路引夏 任文安縣主簿

董宜强 任長安縣主簿

趙城 任安化縣知縣

譚繼龍 未仕

安奇齡 未仕

郭鉉 任景州訓導

鄧邦喜 任延慶衛訓導

李春輝 任沂州訓導

齊慎 任澄城縣丞

樊天爵 任嘉興府經歷

趙廷儀 任諸城縣主簿

范希文 任香河縣縣丞

劉昆 任文安縣主簿

董紳 任長葛縣主簿

殷大輅 任東明縣丞

張萬祀 任涇陽縣丞

楊汝登 任醴陵縣主簿

李逢春 任獻縣丞

廣靈縣誌 卷八 選舉

許攀桂 任孟縣訓導

董效 未仕

劉仕 任寶坻縣主簿

譚學義 任青州府經歷署日照

董聿修 任定州訓導

曹吉 任榮和縣訓導

王寬 任山東商河縣主簿

金登科

張斗南 任太原府教諭

蘭廷弼 任山東青州府通判

任應選 任太原府教諭

馬一龍

李同芳

任應瑞 任大名府經歷

王成憲 授開封府杞縣遞運所

張炳

王家祥 任大名府東明縣教諭

王所萃 任江南徐州碭山縣訓導



梁紀 任北直隸涿州州同

聶家賓 任山東益都縣縣丞陞萊州府經歷

周朝憲 任順天府州判

周朝官 任山東莒州吏目

任新民 任絳州訓導

梁嘉 任陝西漢中府經歷陞平涼縣知縣

周應元 任山東歷城縣主簿

周應魁 任陝西甘肅州衛經歷

梁憲 任鴻臚寺序班

李通 任武清縣丞

張舉 任未仕

田植 任河南府經歷

梁喬擢 任中書

梁宇 授主簿

梁喬變 任四川雄府經歷

國朝

白炳 乙酉恩貢授永寧縣知縣

王植 貢恩

廣靈縣誌

卷八 選舉

譚愷 拔貢考授州判

王五鼎 甲午拔貢任福建古田縣縣丞

魏國俊 考授訓導

董理 任臨晉教諭

曹重光 未仕

白昭 任芮城縣訓導

梁士俊 任陝西興平縣教諭

梁士偉 授河南許州州同未仕

王開泰 任芮城縣訓導陞蒲州學正

王五教 任榆社縣訓導

王五位 任趙城縣訓導

梁士奇 任湖廣益陽縣縣丞

周之飛 考授訓導

武愷 任平定州學正

楊馨 未仕

周之璟 考授訓導

周之拱 考授訓導

李仙品 貢元授潞城縣訓導

殷象瑚 考授訓導



白文煥 任徐溝縣訓導

梁毓奇 考授訓導

仝達 考授訓導未仕

白耀采 考授訓導

張于京 府學貢考授訓導未仕

王五事 任陵川縣訓導

馬中騮

劉智德 拔貢

李長榮 任浮山縣訓導

白屋龍 康熙三十一年歲貢

王逢泰

王振斯 康熙三十五年貢

周楨 康熙三十六年拔貢

齊一相

王際泰

白文瑋 康熙四十年貢

董榮

王謹微

王一勳 貢例

周良弼

廣靈縣誌 卷八 選舉

周雲程 貢恩

白一翳

王慎微 康熙四十七年歲貢

白元聯 康熙五十四年歲貢

譚颺

任淑臣

邱齊嵩 康熙五十九年歲貢

譚颺 貢恩

譚民仰 任襄陵訓導

王紹舜 陵川縣訓導

白元位 雍正元年歲貢

任明命 雍正元年拔貢考授訓導

劉承寶

徐逢盛 例貢由廩生

王復隆 雍正六年拔貢考授縣丞

周文熙 雍正八年歲貢任絳縣訓導

邱齊封 雍正九年歲貢任樂平縣訓導

譚民瞻 雍正八年歲貢任平遙縣訓導

韓廷魁



雍正十二年拔貢公舉人品端方家傳孝友

周文耀 雍正十三年歲貢 任襄陵縣訓導 白本銳 乾隆元年歲貢

王聽聰 乾隆元年恩貢 周知慳 乾隆三年歲貢

杜煥 府學乾隆三年貢 周文炳 乾隆五年歲貢 考授訓導

王明臣 乾隆五年拔貢 白本銳 乾隆七年歲貢

薛撫謙 乾隆九年歲貢 李丕基 乾隆十一年歲貢

譚民聽 乾隆十三年歲貢 周文熾 恩貢

李如蘭 乾隆十五年歲貢 王允中 恩貢

焦宏範 乾隆十七年歲貢 梁如鴻 乾隆十九年歲貢

例監

廣靈縣誌

卷八 選舉

九

明

白以良 恩賜七品冠帶

梁三槐

李延宗 授河南襄城縣主簿

齊克謨 任山東鄒縣主簿

齊克寬 任桐鄉縣縣丞

王文勝 任海門縣主簿

王制 任霸州吏目

齊寅 任寶坻縣主簿

齊濂 任吏目

蘭廷玉

金升 任河間府照磨

周應泰

劉鎮 任商州吏目

李文美 任隆慶衛吏目

曹章

焦鐵

齊魯 任韓府奉祀

李勳 任雲南楚雄府經歷 事陞順德府經歷



董進修

任永平衛知事

王棟

王化

任狄道縣丞

梁喬升

張世慧

任單縣丞

焦從堯

任岐山縣主簿

郭大鷗

温大邦

李汝檢

任四川成都府照磨

任應祥

史尚官

任臨清州吏目

董道修

任萊蕪縣主簿

曹紀

任臨潼縣主簿

曹綬

任紹興府經歷

曹緇

任臨漳縣主簿

白珩

曹師會

曹綽

梁喬梧

任嘉興府照磨

温登魁

任京衛經歷陞臨洮府通判

廣靈縣誌

卷八

選舉

十

鄧鶴

任主簿

温立極

任東城兵馬司指揮

董養正

王之藩

任濰縣主簿

仝尚忠

任臨洮府經歷

仝尚恕

任蠡縣主簿

董肇修

董用威

蘭嘉禾

任涇陽縣主簿

仝進

任石門縣主簿

仝尚恩

任薊州府經歷

仝尚惠

任營州經歷

薛訓

任平涼府經歷

國朝

周丕顯

張潛修

王應運

張清修



韓光祖由武生捐授州吏目

韓一柳由附生捐

武桂

韓峻德任藥州吏目

周所從

曹昌考授吏目

任世勳考授主簿

姚繼賢考授州同職

李弘祖考授主簿

李質永

王績

王聯芝

宋燦

劉九思

郭起

張偉

郭遜

宋尙志考授縣丞

宋隆基

王所武授從九品職

廣靈縣誌 卷八 選舉

李質育

邱集鳳

武玉瑞

郭通

王守業

邱俸鳳

韓士林

王作肅

楊宏宗

任志文

白象庚

王乾

仝鎮海

張守業

郭達

任世昌

薛愷

李崇德

宮麟

譚若昞



陳興玉

生員

現在學冊  
附生武生

廩膳生員額設二十名

增廣生員額設二十名

文童生入學八名

武童生入學八名

武科

國朝

王所賓

李若蘭

王五德

薛晉臣

廣靈縣誌

卷八

選舉

十三

仕宦

後魏

古

弼

有傳

伊

馥

有傳

庾

業

有傳

遼

高

起

任吏部  
尚書

魏

鑑

鄉貢  
進士

金

康

筠

任信武將軍開  
國男食邑三百

崔彥清

任戶部  
尚書

張

道

鄉貢  
進士

元



張顏任元帥

龐清吏部侍郎

齊震

宣府同知有惠政

聶諒大寧路總管祀鄉賢

張守中

任元帥武勇稱奇屢戰克敵祀鄉賢

聶仁諒之子任常德府總管通判陞高州知州

齊成任商州知州

齊思賢成之子任宗正府郎中

明

聶興累有武功陞遵化指揮

李維新任保定衛指揮

仝德化任威衛守備

聶友良諒之玄孫任四川道監察御史

廣靈縣誌

卷八 選舉

三

王尚文有傳

李景有傳

椽吏

元

聶鐸任寶坻縣主簿

李士庸任靈邱縣主簿

明

李延祖任陝西利益倉大使陞贊縣十八盤巡檢

李然詔給七品冠帶

國朝

張博考授從九品

王問臣任卽墨縣巡檢

仝丹宸任大老壩驛丞

仝天錫



白保身

楊永熾 任醴陵縣典史

鄉飲

大賓

譚 颺

邱齊衡

邱齊封

王紹舜

介賓

仝天佑

杜 炳

楊維禧

李含芳

耆賓

劉 珍

郭盛宗

廣靈縣誌

卷八 選舉

西

孟紹孔

譚廷譜

仝世澤

白 宓

封贈

明

李 景

勅贈忠義承務郎光祿寺寺丞

白 冕

寧海縣鐵場巡檢以子塗贈徵仕郎光祿寺大官署署丞

白 塗

光祿寺大官署署丞丞晉階徵仕郎

馬 齡

以子世祿貴勅贈承務郎南京北城兵馬司

温大邦

以子登魁勅贈徵仕郎北京衛經歷

國朝



王來錫 以子問臣 勅贈登仕郎

韓秉鑑 以孫國瓚 贈文林郎

董際時 增廣生以子暄 勅贈修職郎

韓昶 以子國瓚 勅贈文林郎

邱謂 以孫邱齊衡 勅贈文林郎

邱宏志 以子齊衡 勅贈文林郎

襲廕

明

李延齡 景之長子承廕監生 未仕卒補廕嫡孫

李熙 景之孫承祖廕任河南歸德府 通判後調直隸高邑縣知縣

廣靈縣誌

卷八 選舉

五

王翊 主事尚文子 承廕監生

老人

王喜師 百齡老人雍正元 年奉旨建坊

劉登舉 八十一歲老人乾隆 元年給一品頂帶

李碩周 生員乾隆二年 恩詔優敘

農官

楊績

杜焄

王大臣

孫彥林

李府

張恩

郭

楊維雄

醫學訓科



陰陽學典術

僧會司僧會

道會司道會

廣靈縣誌

卷八 選舉

六



廣靈縣誌卷之九

人物誌

物之產於天地間者有幸有不幸五岳四瀆浮羅天  
 臺以及鏡湖洞庭凡禹跡所掩咸稱名盛若夫十洲  
 三島以及扶桑而東沙流而西豈無名山大川堪以  
 庇美中華者卒以僻處海外置而弗論物固有之人  
 亦宜然廣邑地處塞外三明始入版圖忠孝節義已  
 不乏人豈其皇初以至唐宋中國之聖賢豪傑載在  
 史冊者指不勝屈廣邑以水深土厚山高風勁之區  
 千萬年竟無鍾靈有是理哉然後知長才淪于下僚  
 一籌莫展者不必讀天問而浩嘆而奇人傑士沉於  
 窮荒漠外世莫識其名史不傳其姓終於草木同腐  
 者真足惜也誌人物

忠烈

後魏

古

弼

有傳

伊

馥

有傳

庾

葉

有傳

明

王尚文

有傳

李

景

有傳

國朝



周于德有傳

周于道有傳

李冀有傳

仝觀吉有傳

孝

明

袁表有傳

董莒

父卒哀毀骨立水漿不入口者數日既葬以父所遺

緩悉分諸兄弟事繼母以孝聞後由貢仕至壽州判

官

趙昌齡

廣靈縣誌

卷九 人物

二

父早逝母卒廬墓三年後由貢選授封邱縣縣丞有

冰蘖聲擢知柘城事精明果斷至解組歸後囊如洗

柘人自今思之

國朝

韓一蘇有傳

一歐有傳

焦孝

姚瞳人年荒就食蔚州其母病思食肉貧無以供孝

不令母知割股以奉其母食之疾果愈人以爲純孝

所感云

李中元



性仁孝其母王氏右足患疽瘡服藥不效中元口嘔  
吮每日二次三年不倦

韓士奇

邑廩生霸州牧國瓚第四子性至孝父歿既葬廬於  
墓側服闋乃歸

義

明

武進儒

儀賓萬歷時歲大饑出粟千斛悉捐以救子遺邑侯  
旌其門曰克昌厥後

廣靈縣誌

卷九 人物

三

蘭朝海

尚義輕財曉行拾白銀一囊書楮門城巷口越數日  
亡金者來索朝海詰明還之

國朝

韓大德

孝子一歐過繼子一歐應分資產約值六百餘金族  
謀追給大德大德曰爲孝子後必分田產是義舉反  
爲利舉矣不受遂窮約以終身

宋洪愷

仗義疎財見廣邑城神廟傾圮捐銀五百兩香火



資五十兩炭堡地價銀三兩五錢關帝廟捐銀三十  
六兩他處捐銀亦多

賀成

家甚貧黎明赴市傭工拾銀五十兩候守至晚挾銀  
歸家後失銀者至成問明給還失銀者欲中分成堅  
拒不受

韓秉鑑

國瓚之祖性豪爽樂施予先人多積儲文券盈箱已  
踰千紙秉鑑焚於通衢鄉里義之

節婦

廣靈縣誌

卷九 人物

四

明

梁氏

劉大海妻年二十八歲夫遺子儒撫育成立其在  
嫠室非拜先壠不出戶庭持節始終無間言嘉靖中  
有司以事聞建坊旌表

趙氏

太學生譚繼龍妻夫氏年二十四歲子香尚在襁  
褓氏撫育周密嘗言譚氏宗祀止此子耳倘失愛護  
妾何足惜如譚氏宗祀何萬歷十一年知縣劉公審  
問匾旌其門



王氏

董繼妻繼卒氏年二十九歲持志孀居撫遺孤子自修成立爲安定驛丞萬歷十一年劉公審問匾旌其門

郭氏

任朝陽妻陽故氏年二十歲腹有孕每夕焚香祝曰願天賜一男妾夫爲不亡矣後果生男名鼎郭氏撫之周密姑縱次子逼氏嫁而利其產郭氏執節毀容以死自誓姑知事不諧凌辱萬狀氏事姑愈謹卒得母子相保後子鼎年七十七始卒

廣靈縣誌

卷九 人物

五

國朝

譚氏

任斐小妻夫 氏年十九歲公姑以無出欲嫁之氏曰身有遺腹男女皆夫之嗣也願爲未亡人數月產男品秀氏斷髮毀容以保孤自誓品秀甫遊泮不幸天亡遺孫若尹零丁孤苦方離乳哺氏撫育成立一如教子壽七十一歲知縣孔公際魁匾旌其門

李氏

王前陳妻年二十歲夫 生子紹祖未彌月晝夜號哭幾不欲生翁姑諭曰吾家兩世止有此孤汝能寡



守保護王氏之宗不絕何以死爲氏仰天誓曰敢有二心者鬼神誅之於是茹苦食貧上事公姑下撫幼子後紹祖列黌宮食廩餼三十五年內外無間邑侯李公煥斗匾旌其門

周氏

生員梁士彥妻夫氏年二十九歲子承芳方在襁褓翁姑詢曰汝年少家貧子幼難以苦守不如早自爲計氏曰夫雖死子尚存妾忍舍翁姑幼子而作他想乎茶苦自甘撫訓幼子後承芳入泮始終如一人無間言氏以壽終邑侯李公煥斗匾旌其門

廣靈縣誌

卷九 人物

六

宋氏

梁士達妻夫氏年二十五歲子雲芳年未週伯叔父母欲強嫁之氏誓曰妾若嫁人有何面目見夫於地下乎立志守貧刻苦撫育邑侯李公煥斗匾旌其門

宋氏

生員梁六德妻夫氏年二十一歲子士顯五歲士美三歲翁姑泣曰吾兒早死遺二幼子倚誰撫乎氏泣曰夫死有子妾撫之則可報夫於九泉矣自甘荼苦孝養翁姑訓育幼子後二子俱入邑庠長孫羸芳



亦列武生享年七十五歲邑侯李公煥斗匾旌其門  
李氏

王吉士妻夫氏年二十八歲或勸以男女俱無曷  
改適氏謂夫無應祀之男未亡人與夫合葬其願足  
矣衣鶉結飯糠糲備極艱苦終身不悔壽六十七歲  
而終

李氏

適王吉甫與吉士妻嫡堂妯娌也夫年二十六歲  
無嗣家貧如洗矢志守節拾薪菜勤針指以終其身  
鄉人謂一門雙節宜享殊典云六十九歲

廣靈縣誌

卷九 人物

七

李氏

陳吉榮之母夫將死以布半疋遺氏曰若能守乎見  
布如見吾不則請以是爲資粧氏啼泣不語後甘貧  
守節其子吉榮不幸早逝撫其孫發壽至七十八歲  
臨終囑其孫曰吾今始得見乃祖於地下矣卽以此  
布爲殮服

劉氏

劉芳珠妻夫氏年二十八歲矢志守節貧苦萬狀  
勤女工拾薪菜撫養二子劉林劉宗成立守節三十  
四年而終



宋氏

生員喬鼎繼娶妻也年十九而夫卒遺子名魁甫二歲氏冰霜矢志靜守閨門非歸寧不輕出事翁姑以孝聞育幼子以嚴著守節三十一年而終

郭氏

姚生廣之妻年二十六歲夫卒孤窮無依掘鳧茨鑰脫粟而食之撫子姚臣不幸早繼撫孫姚進孝曾孫姚普子年八十二而卒

張氏

常顯豪妻年二十七歲夫卒子均甫四歲孤苦伶仃

廣靈縣誌

卷九

人物

八

百事維艱氏親身耕耘養幼子成丈夫苦節三十年  
李氏

武興昌妻年二十八歲夫卒伶仃無依拾薪菜艱苦備嘗撫子武銳武鏘成立壽七十八歲終

傅氏

周於昌妻年十九歲生子甫彌月夫卒父母憫其少欲嫁之氏立志冰霜茹苦食糲後其子鼎爲邑庠生壽八十一歲

楊氏

生員張步蟾妻年二十四而夫卒遺子肇鳳甫襁褓



氏哀毀骨立獨居一室勤女工敦婦道冰霜爲操終始不替年五十五歲

史氏

王廣明妻夫氏年二十六歲遺子金甫四歲次子寶遺腹子也氏甘貧守節迄今二子成立苦節三十年

胡氏

適史光體年二十六而夫卒遺子懷誠方二歲伶仃無依氏食糠茹菜撫子成立壽六十一歲而卒

袁氏

廣靈縣誌

卷九 人物

九

韓名金妻夫年二十五歲遺子齡甫六歲氏甘苦備嘗百折不回撫子成立壽六十三而終

陸氏

陳舜妻年二十六而夫卒遺子三人俱幼氏伶仃無依百苦備嘗撫子成立苦節三十四年終

梁氏

史光彩妻年二十八歲夫遺子懷智始八歲備歷艱辛常採薪拾菜撫子成立苦節三十四年而終

王氏

胡進相妻年二十三夫遺子得貧苦百端終無改



志享壽八十三而終

韓氏

安永和妻里民韓昌喜之女也年二十四而夫遠客  
天亡子女俱無家餘四壁婦以死矢志備極艱苦歸  
依其父以度日守節三十一年

劉氏

適趙吉年二十四而夫 守節四十三年

焦氏

生員李篤敬之繼妻夫 氏年二十一歲苦節不援  
撫前妻子淑身若已出前 太守旌其門曰孝慈順

廣靈縣誌

卷九 人物

十

德

張氏

史光第妻年二十七而夫 遺子懷祥方四歲氏拾  
薪刈菜勤針指傭女工以撫幼子不幸懷祥早亡依  
侄懷仁以終身

宋氏

楊職榮妻夫 年二十三歲子譽遠甫兩月守節四  
十七年撫子成就孫詞宗名列膠庠壽七十歲而終

黃氏

魏居尊妻夫 氏年二十七歲子式方九歲終日痛



泣不欲生後夢其夫語曰爾能爲我撫子成人豈不  
愈於死乎由是拾薪茹菜艱苦備嘗守節三十六年  
李氏

生員梁維漢妻夫氏年二十八歲冰雪存心義方  
訓子其子久榮成人入泮不幸早故又守孫培猷壽  
八十二歲

宋氏

梁維能妻夫氏年二十六歲堅意守節撫幼子久  
存成人早故又守孫培元備嘗艱苦志終不少易壽  
七十五歲而終

廣靈縣誌

卷九 人物

七

彭氏

宋國治妻夫氏年一十九歲長子賢遺腹子良家  
貧無資傭工度日茹苦含辛艱難非常隣媪或勸之  
嫁輒怒撫二子成立壽六十五歲

張氏

王順妻夫氏年二十八歲性甘淡薄持守嚴肅撫  
子中魁成人入泮不幸早又守孫居安迄今壽七  
十五歲

曹氏

王禹妻夫年二十三歲姑曰爾年幼家貧吾難強



女可自爲計氏曰女子以節爲重况姑寡子幼兼有孤侄義不忍舍守節三十二年

劉氏

王成功妻年二十七歲夫病謂劉氏曰吾止有一子甫兩月我死汝當爲我養之成立之後任爾所爲劉氏曰諾及夫卒堅志守節壽六十一歲

曹氏

薛瑪妻年二十八歲夫遺子謙誠方七歲謙恒方二歲氏貧苦無依勤女工拾薪菜撫二子成立守節三十四年

廣靈縣誌

卷九 人物

三

許氏

曹振裔妻夫氏年二十七歲遺子甫及六月氏誓守節足不踰戶子七歲又或勸之改適氏以夫死他適無顏見夫於地下遂單身獨居茹苦食貧守節四十七年

滑氏

白用六之妻夫氏年二十八歲遺子昌齡年未一週氏賦性堅貞訓子成立謹奉先祀苦節三十餘年

焦氏

仝文昇之妻氏年二十三歲夫無子其長門之子



隨母改嫁氏曰大伯之子吾侄也今卽隨母帶去豈無歸宗之日爰是勵志守節及伊侄歸宗後氏爲娶妻生子以奉先祀享年八十有二

王氏

李昶之妻夫故氏年二十七歲撫孤守節矢志松筠今現年七十四歲

任氏

周多相之妻夫氏年二十七歲遺子維道未及週期氏茹苦食貧孝事翁姑後維道又亡僅一孫相倚堅志守節四十餘年

廣靈縣誌

卷九 人物

三

亢氏

生員仝文眩妻年二十九歲夫子于陞甫十歲氏訓讀書入庠守節四十餘年

李氏

庠生徐有仁妻幼適徐門夫氏二十六歲遺子聯科年未一週氏孝事翁姑艱苦備嘗撫孤入泮始終靡他苦節三十餘年

魏氏

宋鴻傑之妻夫氏年二十七歲遺子朝相甫三歲氏奉姑守節甘心貧困苦節五十年



宋氏

白天德之繼室十八適天德越三載而夫遺孤允八歲氏煦育訓養無異已出有因家貧勸氏改適氏曰夫門兩世單傳承宗祀者止此一綫骨血姑老子幼焉忍他往矢誓守節苦節三十一年前任韓公賜匾曰栢舟自矢

李氏

仝貞吉之妻年二十五歲夫遺孤文豸方五歲氏斷髮毀容矢志守節既蔬水以承觀復詩書以課子文豸名列膠庠守節四十六年

廣靈縣誌

卷九 人物

古

曹氏

梁遇春之妻夫氏年十九歲心明大義志凜冰霜事親撫孤苦節四十年撫憲石題請奉旨旌表

王氏

曹維均之妻夫氏年二十一歲撫遺腹子晬訓以義方翁姑年老家貧氏生事死葬各盡其禮苦節五十餘年奉旨旌表

蘇氏

王賜祿妻夫氏年一十八歲嗣子方數月氏孝謹性成婦供子職母兼父道苦節三十七年撫憲阿



以青年守志白首完貞具題奉 旨旌表

楊氏

任金之妻夫 氏年二十九歲家貧志堅苦節五十二年

王氏

王之植妻夫 氏年一十九歲苦志守節三十一年

劉氏

王之屏妻夫 氏年二十八歲遺子德甫三歲家貧無以爲資氏終歲茹荼食貧苦節三十五年

馬氏

廣靈縣誌

卷九 人物

五

杜明心之妻夫 氏年二十一歲遺子曦甫四歲遺腹子映氏矢誓守節曦映皆列邑庠氏苦節二十餘年而歿

焦氏

王聯榮之妻夫 氏年二十二歲苦志守節上事翁姑送終下撫幼子成立現年五十三歲

楊氏

庠生徐廷璽之妻夫 氏年二十一歲遺子養志甫二歲氏誓守節奉孀姑撫幼子備極艱苦

李氏



徐廷璧之妻夫二氏年二十二歲艱難辛苦志貫金石撫孤子養氣苦節二十年而歿

張氏

韓顯瑞妻年二十四歲而夫卒懷孕甫四月氏孤苦無依用菜鏟掘地種植禾稼撫遺腹子大鼎訖於成立苦節三十二年

仲氏

楊維垣之妻年三十守節撫孤其子又無嗣氏飲冰茹苦四十餘年而終

白氏

廣靈縣誌

卷九 人物

六

劉漢綱妻夫二氏年二十四歲撫遺腹子師顏立志苦節四十一年

李氏

劉漢紹妻夫二氏年二十三歲撫子師曾苦節三十三年今尚存

常氏

李有庫之妻年二十六歲夫卒翁鰥居雙目失明氏備歷艱辛色養不衰後奉翁以終天年

韓氏

郭立慈妻年二十八歲夫家貧無資姑寡子幼不



忍改節日織一蓆孝事孀姑衣食無缺人咸重之  
梁氏

梁澤妻夫氏年十九歲子二歲守節二十一年上  
事翁姑色養備至始終無間人以孝稱

孝婦

陳氏

南村寄民姚生德妻也生德遠客他鄉十載不歸姑  
憫婦之孝勗改適婦號哭不忍去常拾薪傭工以養  
老姑備極艱苦毫無倦色後生德歸奉母以壽終不  
三年生德又氏食菜茹蘗年七十一歲無子



後編

修誌之體立法不得不嚴而善善則又欲其長如男婦之志行表表萬無可議者無論已往現在或爲立傳或附小傳矣至男夫一行可取堪爲典型婦人或守節年逾三十而孝親撫孤堅貞不移或守節在三十年以內及今現在年例未符而冰霜矢志可決終身者悉錄于左以俟將來斯與人爲善之意也夫男夫

高朝興

家貧業農五更起拾糞路旁見遺布一馱興守之不去後遺布者至興盡數歸之

宋尚志

邑西石梯嶺日久傾圮尚志捐資修之

王國慎

康熙十一年歲荒族中逋賦者八十餘人俱監北國慎保出族人逃亡受累最苦代爲完納又不忍族人流亡一一召回田宅交還賠累不責其償

仝于貴

克恭於兄



婦女

楊氏

楊瑾之妻十七于歸半載夫家道貧苦又無翁姑可依守遺腹子志堅金石今已逾二十六年矣

梁氏

劉苒妻生子成先方彌月而苒婦年二十五哀毀營葬砥志守節孝事寡姑備極周詳撫育幼子現年四十七歲

韓氏

生員宋苞之繼室夫氏年二十八歲孝事翁姑無所出撫前妻子無異已出

廣靈縣誌

卷九 人物

九

周氏

宋璣之妻夫氏年二十二歲孤身守節孝事翁姑矢志不移

譚氏

王希富之妻夫氏年二十八歲姑老子幼氏辛苦備嘗冰霜爲心已二十六年矣

白氏

譚連之妻夫故年二十歲生一子未週歲氏苦節自勵撫子成立始終如一



楊氏

徐逢盛之妻夫長子廷璧相繼次子廷璽甫一週氏賦性清潔凜若冰霜歸寧而外足不踰戶守節三十三年而歿

閻氏

韓麟翔之妻夫氏年一十八歲子女俱無家貧如洗氏矢志堅貞以死自誓菽水奉親婦供子職今已二十年矣族人韓修德等捐地六十畝以贍之有司匾旌其門

趙氏

廣靈縣誌

卷九 人物

三

韓國珩之妻夫氏年二十三歲遺子士望方數月氏哀毀骨立矢志冰霜孝親撫孤已二十五年矣  
梁氏

韓林妻夫氏年二十六歲遺子作聖作相皆幼氏敝衣疏食艱苦備嘗貞操如一守節二十三年矣



廣靈縣誌卷之十

藝文誌

藝文者誌書之餘緒也修誌者類以藝文綴於卷末用以紀運會之盛衰景物之佳麗興作則有記人物則有傳如斯而已廣邑雲中僻邑也寫太平則唐太宗飲馬長城窟一首盡之詞曰塞外北風切交河水已結瀚海百重波山陰千里雪迥戍危烽火層巒引高節悠悠卷旆旌飲馬出長城寒沙迷騎迹朔吹斷邊聲胡塵清土塞羌笛韻金鉦絕漠干戈戢車徒振原濕都尉反龍堆將軍旋馬邑揚麾氛霧靜紀石功名立荒裔一戎衣靈臺凱

雲中之盛即廣邑之盛也寫離亂則子蘭一首盡之

廣靈縣誌

卷十 藝文

詞曰遊客長城下飲馬長城窟馬嘶聞水腥為浸征人骨豈不是流泉終不成潺湲洗盡骨上土不洗骨上冤骨若不沉水四海有還魂空流嗚咽聲聲中疑是咽

雲中之衰即廣邑之衰也又山邑無多興作其文城池等記已悉舊誌八景雖多附會但名人題咏頗繁亦選其尤者載入誌內唐宋以前如筆公等前史未盡以為廣邑人因舊誌鄉賢既已採入即仍之以光誌乘惟勝朝王李二公之精忠

本朝二韓之孝友二周李全之節義浩氣貫日至今猶有生氣舊誌或載或闕畧無表章殊屬憾事爰同共事諸人或立之傳修其墓有能詩者並為題咏雖曰誌



書之餘緒其于振興風化不無小補云爾誌藝文

重築廣靈城碑記

熊璋豐城人

宏治紀元之八年沙河孟公繼先奉命來治廣靈邑臨北邊土瘠民貧素號難理非才通識敏之士或不足以有爲也侯到任首以課農興學爲務平催科清訟獄不苛不擾民甚便之尤慮縣近邊境無以保障斯民雖有古城年遠傾圮欲修築葺理以爲保障之具于是申達於各上憲設法措置庀材鳩工起於九年三月落成於十年九月城郭樓櫓煥然一新足以聳人之觀瞻壯邑之金湯矣侯蒞政未及三載政通

人和百廢俱舉復丐余文以爲之記余維侯之加惠斯民博矣旣教養之周尤保護之至真無負於民之父母哉昔卓茂由密而陞太傅周榮自郾而擢尚書魯恭起中牟而官至司徒皆由治邑獲褒寵之榮也侯若不自滿假益勵厥守殆將與曰茂曰榮曰恭齊驅而並駕者矣遂爲之記

甄包廣靈城記

翰林院 劉虞夔高平人

嘗讀易曰王公設險以守其國惟城斯險惟險斯固郡邑之不可無城也尚矣但築於土者厥功若易而難於悠久惟包之以甄則金湯鞏固而利及萬世謹



按廣靈邊關伊邇民易罹鋒鏑前令尹東光王侯春  
鑿土木之變始謀重築延袤三里許若堪保障而襍  
久傾圯保安張侯理南暨馬侯承志相繼修葺視昔  
頗可觀而悠久則未也隆慶辛未喬侯甫視篆登城  
眺望慨然興嘆曰斯城可以衛吾民乎今天子聖明  
邊境寧輯然未雨綢繆古人所尚及是時而包以甃  
可保無虞會督撫吳公閱邊令郡邑土城者磚之檄  
至侯欣然喜曰吾素志也乃謀諸守備程公萬里典  
史吳橋宋汝楠及邑之薦紳耆耆量地度基計工分  
力慮財之匱也請給於內帑白鏹七千餘兩恐民力

綿弱借蔚渾民壯若干名又簡省祭王宦等及陰陽  
之勤敏者分董之衆聞命若踴赴義若趨砥礪伐諸  
山薪薰取諸野磚垣成於陶甕餐餽於傭殫力供役  
弗緩弗急侯公暇躬蒞其地檢勤惰而勸懲之以故  
動雖衆而閭里不驚勞雖大而功爲易就未朞年而  
雉堞聳飛巍峩屹立厥績告成矣美哉洋洋乎誠萬  
世之利也城周圍三里五分仍舊貫也石基三尺磚  
八五聯翼堅久也垣高四丈女牆七尺杜侵侮也門  
樓二角樓四遠觀望也敵臺有八上置鋪舍便防守  
也濠之深濶俱三丈固地利也非侯慮周而識遠謀



定而畫詳胡能底績若是耶是役也經始於萬歷甲戌落成於萬歷乙亥侯諱密字汝登別號東游陝西同州人也乙卯鄉貢進士今陞霸州刺史廣靈以侯行而功不可泯俾余掇摭其槩若與學校禮薦紳邱孤笑墾荒田鋤豪右節冗費操堅不改廉勵無求善政種種將必與斯城俱垂悠久民之口碑自在焉

廣靈縣重修文廟記

翰林侍講 張天瑞 清平人

今天子卽位改元宏治春三月上旬吉視學先期命有司修飭廟學蓋崇儒重道爲天下先卽古昔聖帝明王繼天立極君師億兆之盛意也亦將由此責天

廣靈縣誌

卷十 藝文

四

下郡邑之有司其亦當仰體聖明於萬一哉廣靈邑屬雲中戰國代地也國朝宣德間卽有廟學以隆祀事資師生講習時就簡畧規制弗稱月日邁征寢就頽圯適東魯寧陽程侯來宰是邑滌篆餘卽謁學展禮先聖先賢已而進諸生暨儒師詢廟學廢置訖旋卽視事蓋中已有定規不預言也爰考滿政通人和年穀乃登百廢斯舉工鳩不苦材庀孔良民無驚畏費有酌量始新大成殿爲間凡五深四丈廣六丈高如廣之半有奇瓦砌琉璃木飾青碧宜聖配哲悉以塑像次新戟門爲間三高二丈四尺廣三丈七尺東



西廡爲間各五深廣高如殿之半諸賢位悉易以木  
主次新櫺星門爲間如戟門數明倫堂日新時習二  
齋亦如之而堂之左右翼以兩間爲廂房其一供宴  
息其一貯史籍深廣高視殿制三之二儒學門則自  
東移之櫺星門右與南山黃花嶺相直後踞城垣前  
迎高阜左右闕壯視昔有加射圃則移之學宮之西  
朔一亭曰觀德於號舍厨庫祭器罔不畢舉是役也  
興工於宏治乙卯春三月落成於是歲秋七月吉其  
寮案師生輩莫不相慶曰吾侯此舉一時之盛事矧  
六事俱舉而此則六事中第一事不刻之石其奚以

傳乃介書於予爲之記惟曰凡有興作政必通人必  
和事乃克濟以侯之政事皆得其宜以侯之人民皆  
得其歡心以政事人民旣通且和如此所以仰體聖  
明崇儒重道君師億兆之盛意而爲此聖賢祀事師  
生講習之盛舉非其心之存於中者有素而其才之  
發於外者有爲殆不及此又况教化之所由行人才  
之所由出悉此焉賴使凡爲有司者皆若此則夫聖  
明之責望有司之職任其有不能仰副而畢舉者哉  
若侯之事功信可紀也遂備書俾刻之侯名觀字子  
昇以詩經擢成化丁酉鄉貢進士初授蒲州學正教



成晉今職云

重修文廟贊 小引

刑部魏象樞 蔚州尚書人

聖道之大如日月經天如江河行地無微不通無幽不照學者仰止宮墻自少至老日用飲食五常萬善孰敢不敬守我 孔子家法哉廣靈貧邑學廟久傾絃誦間歇今邑侯焦公來蒞茲邑能知大體首先倡捐而鼎新之以崇祀事課諸生典禮備文教興矣工成屬余一言為之贊贊曰讀聖經感人心學宮茂草任銷沉修蘭若捐多金世俗江河已到今彈丸邑窮子衿仰止宮墻歲月深瓦礫亂風雨侵補葺還愁力

不任嗟乎嗟乎事其事空谷音

重修學廟序

譚 愷 邑人通判

學宮治平之本也三代而下稱盛世者莫若建武光武息馬論道親祀闕里傳至孝明臨離拜老執經陞座園橋門而觀者冠帶雜還故一時風物莫不炳炳燐燐焉推之郡國下邑各立學校則任茲土者不惟簿書期會而已必以教化為大務俾君子由以育其材小人亦以輯其志泮宮數仞豈在廟貌榱桷云爾哉廣靈菁莪蔚興英賢繼起其由來尚矣近年兵燹頻仍凶荒疊見士子謀身尚且不遑奚暇計及學宮



乎仰瞻廟宇大成殿墜瓦飛鴛四維雖尚可支亦難免風穿雨濕之虞兩廡俱斜欹將仆數椽零亂再觀戟門櫺星門暨鄉賢名宦兩祠棟折宇摧垣頽壁破牛羊伺以爲囿市人走以成衢肅穆文明之地竟爲茂草瓦礫之場矣邑人士雖歛歔感嘆終不敢輕爲修舉邑侯焦公甫下車謁廟日覩心慘慨然以修葺爲已任爰集紳衿而謀之予焉先捐其貲因思工程浩大物力艱難非藉衆助莫能成也諸士志不忘本無拘多寡隨其力之所至而樂輸之庀材鳩工亦能次第就理將見廟貌新則禋祀肅教化廣則德業進

甲第踵興人文蔚起矣聶王諸公豈獨專美於前哉余願諸同志無負邑侯興學造士之苦心以共勦盛舉云爾

重修城隍廟記

巡撫都  
御史 雷 復

先王制禮皆以義起者也禮曰凡有功德於民者則祀之然城隍之神其祭昉於何時乎自唐以來郡縣皆立廟以祀後世因之所以保障生民通節乎內外默相陰佑厥功彰彰於旱蝗則禱之於癘疫則禳之于歲時則報賽之視他祠以令式從者爲尤謹非所謂有功於民而祀之者乎廣靈之有城隍廟蓋舊制



也歷年茲久既敝且陋令尹恒山孫侯一日行事祠下慨然嘆曰廟所以棲神今其廢壞無以蔽風雨則神且弗棲况舉吾祀乎於是捐資命工掄材以葺而新之民皆歡趨以就工役無敢後先闢其基址增其舊制前爲堂肖神像於其中後爲寢室外爲三門庖福有次望廡有所繚以垣墻堅其扇鑰堦除之下樹以名木鐘鼓籩豆百廢俱舉規模制度輪奐交錯經始於正統九年秋七月朔旦落成於明年之六月望日賓從僚吏胥晉祠下乃以羊豕告祀焉復不鄙遠以書屬俾書其事惟夫令之政治民事神而已邑之休戚舉係於令神能警動福禍以食乎民古之人必先成民而後致力於鬼神則民和而神乃降之以福否則黍稷雖馥神其吐矣此其所以爲神民之主也孫公之令廣靈盡除前令之弊以廣維新之化薄於奉養而厚於鬼神卑其室廬而宏其廟宇故能蕩滌爲祥化癘爲和嘉谷用登民俗丕變神用歆享百靈感從公可謂知所當重故爲不悖於義矣是用勒之石以垂永久云

古弼傳

北魏史

公代人也少忠謹善騎射初爲獵郎門下奏事以敏



正稱明元嘉其直而有用賜名曰筆後名弼以其有  
輔佐才也令典西部縮機要太武卽位以功拜立節  
將軍賜爵靈壽侯歷位侍中吏部尚書典南部奏事  
鎮長安有威名征仇池平之叅政事遷尚書令雖事  
務殷湊而讀書不輟端謹慎密口不言禁中事上谷  
人上書言苑囿過度人無田業宜減大半以賜貧者  
弼入欲陳奏遇帝與給事中劉樹碁志不聽事弼侍  
坐良久不獲申聞乃起於帝前摔樹毆之曰朝廷不  
理實爾之罪帝失容放碁曰不聽奏事過在朕樹何  
罪置之帝奇弼公直皆可其奏弼曰爲臣逞志於君

前其罪大矣乃免冠請罪帝溫語褒之太武田於河  
西弼留守選肥馬備軍實以羸馬給獵者帝大怒曰  
尖頭奴敢裁量朕耶還臺先斬此奴弼告屬官曰事  
君使田獵不過盤游其罪小不備不虞使戎寇恣逸  
其罪大方今北狄孔熾南虜未滅是吾憂也苟利國  
家吾寧避死乎帝聞而嘉之後田於山北獲麋鹿數  
千詔尚書發車牛五十乘運之帝尋謂從者曰筆公  
必不與我不如馬運之速而弼表已至謂秋穀懸黃  
麻菽布野賜矜緩使得收載帝謂左右曰筆公果如  
朕卜可謂社稷之臣後以巫蠱伏法時人寃之



伊馥傳

北魏史

公代人也少勇健走及奔馬善射力曳牛却行仕魏  
 為侍郎太武將討涼州議者咸以無水草諫唯司徒  
 崔浩勸行馥曰涼州若無水草何得為國宜從浩言  
 帝善之及尅涼州顧謂浩曰馥智力如此終至公相  
 特未讀書耳浩曰何必讀書然後為學衛青霍去病  
 亦不讀書而致公輔遂拜秘書監賜爵河南公拜司  
 空清約自守為政舉大綱而已不苛碎大安二年領  
 太子太保三年平尚書事薨

北史本傳今  
祀鄉賢祠

庾業傳

北史

廣靈縣誌

卷十 藝文

十

公代人也後賜名岳其父及兄和辰世典畜牧苻氏  
 內侮收斂畜產富擬國君劉顯謀逆道武外幸得其  
 資用以和辰為內侍長岳為外朝大夫參預軍國從  
 平中原拜安遠將軍又以戰功賜爵西昌公岳為將  
 有謀畧士眾服其智勇名冠諸將及以所統六郡置  
 相州即拜岳為刺史秉法平當百姓稱之遷司空侯  
 官告岳衣服行止擬於人君遇道武不豫多猜忌遂  
 誅之時人咸寬惜焉後詔為立廟令一州之人四時

致祭

祀鄉  
賢祠

袁孝孫傳

舊誌



公諱表其祖年老父吉家貧莫能供菽水以杷載乃翁送山中歸將投杷於火表年甚幼取而懸之吉問曰懸此何用表泣對曰預爲阿翁具苦聞言俛首悔悟表乃引杷循故跡載祖以還後杷跡所歷草皆偃生至今尚存人以爲孝感所致云

今祀鄉賢祠

明戶部江西司主事王公傳

邱齊衡

公諱尚文姓王氏少穎異讀書目數行下爲文操筆立就然不喜爲詞章訓詁之學每遇古聖賢忠孝節烈事輒欣然神往曰讀書人當如是矣宣德乙卯舉於鄉明年成進士授戶部江西司主事在部勤敏熟

於掌故雖老吏無以過也積宦旣久能聲益著當以次陞秩會正統十四年秋七月也先入寇司禮監王振挾帝親征大兵起行本部會推精明強幹數員以督兵餉僉曰莫有過於王某者尚文遂以督餉從八月巳酉帝駐大同振益欲北出有以恐墮敵計密告振者振始懼班師至雙寨雨甚振初議道紫荆關由蔚州邀帝幸其第旣恐蹂其鄉禾稼復改道宣府軍士紆廻奔走壬戌始次土木瓦剌兵追至師大潰尚文得脫行數里駕久不至謂從者曰今師徒撓敗而主上無消息倘有不測吾何面目歸見中朝人士乎



吾當返與之同命從者有難色尚文曰臨難苟免吾不爲也遂奔還求上上已陷入瓦剌營擁而北行尚文踵駕號泣隨之遂被執不屈而死後英宗復辟錄死節之臣勅賜崇祀鄉賢廕子翊入監

贈光祿寺寺丞李公傳

杜煥

公姓李氏諱景幼敏慧弱冠補博士弟子員博聞強識於書無所不窺屢困場屋遇益窮學益邃正德中起家歲貢判高郵州居官剛毅清慎蒞政嚴明以治行擢知河南開封府西華縣事益勵精有爲清操無異作判時吏畏其威民懷其德時值流賊猖獗所至

剽掠勢甚劇景乃整飭樓櫓操練士卒爲守禦計賊果率衆攻城景躬擐甲胄晝夜巡視以大義勸諭士民民見其忠義激發實出血誠皆樂爲之用相持日久糧且盡援兵不至以創殘餓羸之餘禦凶悍日益之衆備于東而缺于西雖有智者無以善其後矣及城陷景朝服北面再拜曰臣力竭矣城破被執賊持刀脅之降景厲聲曰我天子命吏豈向汝求活耶奴輩速殺我罵不絕口遂遇害給事吳玉榮以事聞武宗嘉其節勅賜忠義丞務郎光祿寺丞賜祭一壇廕子延齡入監未仕卒補廕嫡孫熙任河南歸德州通



判調直隸高邑縣知縣有政聲

韓氏雙孝傳

仝懋官

韓一蘇弟一歐南村庠生邦和子也家世務農入橫經出負耒耕讀之暇閉門却掃不知有戶外事居家以孝友相先庭幃之內怡怡如也順治元年闖賊餘黨往來雲朔間所至村落一空莫敢誰何一日賊至縛邦和而拷之一蘇兄弟聞父被執徃遽失措急挺身向賊丐求願以身代辭甚哀賊并縛之兄弟受拷血肉淋漓哀籲不已賊憐其孝而釋其父一歐立斃一蘇亦垂死及賊退一蘇復甦聞其父存而喜曰吾

雖垂斃吾父尚有幸甚但痛吾弟之死爲過慘耳遂調養備至父得享其天年一時之人咸稱韓氏兄弟一死一生皆純孝云

國初死事周義士傳

李薰附

韓國瓚

周於德弟於道北鄉庠生周之屏子也家貧力學受業於父於德早歲遊庠一門之內規言矩行鄉人薰其德而善良咸師尊之順治五年總兵姜瓖叛據大同六年二月渾源逆黨朱廷佐糾集千餘人剽掠庄堡邑奸民李青許登旺等勾連賊衆圍攻縣城當是時城內無駐防兵邑令范公以大義勸諭士民晝夜



捍禦賊勢張甚城幾危者數矣之屏父子乃倡義招  
集鄉人諭之曰事急矣吾輩當出死力以赴國難若  
使劇賊得志吾等寧有子遺耶遂統率鄉民並中表  
李冀挺身赴援賊大至邀擊於後於德兄弟及冀大  
呼督戰衆寡不敵俱被執不屈而死噫一介書生橫  
身殉國穴頸洞胷斯可與古人爭烈矣因事未上達  
亦無卹典竟使英魂強魄悽風泣月磅礴於荒燐宿  
草之間悲夫

全義士傳

郭 磊

義士名觀吉廣邑巨族也性慷慨武健絕倫人以樊

噲目之公亦以噲自負順治五年姜逆叛亂據大同

廣邑土豪

李青等

倡亂聚衆攻城當是時賊黨洶洶援

城義士周於德兄弟遇難又無駐防兵邑令范公仰  
天嘆曰城休矣今大兵駐雲中有敢冒陳告難者乎  
觀吉奮臂大呼曰公用某某不惜死范壯之漏下三  
刻從西城絕出持短刀行山谷中次日傍午達雲中  
直抵幕府大呼求救時英王以懿親握兵符屯雲中  
聞之令反接而入問之遽道所以王壯之釋其縛賜  
之食觀吉大呼曰廣靈煙火不舉三日矣王賞臣臣  
食不下嚥王益奇之遂命騎兵往捕卽以觀吉爲鄉



道雷奔電馳一晝夜駐城西嶺時往返未及三日行  
五百里觀吉精神百倍抵城大呼曰天兵至矣范公  
聞之曰此全某聲也遂帥民兵開門殺出賊黨悉竄  
獲賊首李青等戮於市仍赤其族賊平當事者欲上其  
事於朝范令曰吾不能防範於前微全某之力不及  
此敢自以爲功乎事遂寢義士之功亦未見錄後爲  
武庠卒且無後君子曰天道福善禍淫由來久矣今  
凶逆族滅義士亦無後天道茫茫尚可問哉

邑侯李公傳

王蓋臣

公諱煥斗字谷愚江西新淦人康熙中知縣事時值

連歲旱疫十室九空蒞任之初卽詳請豁免絕戶錢  
糧兼籲賑濟皆如所請民困得甦竭力招徠勸墾流  
民復業舊例大同府大有倉捐貯米石俱令大同州  
縣運送出殺虎口交卸民困此役非一日矣時廣靈  
又派運七百石公復泣陳情苦兼請設法調劑通省  
照糧公捐事得寢民無派累其實心爲民多類此他  
如設義學修邑誌戒賭博示節儉警刁風除煩滌苛  
百廢俱舉在任九年清廉公正平恕有容祀名宦祠



詩

送李谷愚之任廣靈

侍讀施閏章宣城人

素交眼底獨推君，古道文章迥不羣。  
家傍清江心共許，人當燕市手重分。  
馬蹄曉踏白登雪，雉堞晴看紫塞雲。  
聞道襄陵多美酒，不妨賓主共論文。

送李谷愚之任廣靈

檢討黎騫清江人

十載題名重玉京，今看結綬向邊城。  
天涯別有江淹淚，冰署人懷鮑叔情。  
朔雪不侵燕塞路，福星直指鴈門行。  
安民卽是酬明主，寒徹梅花人御羹。

攝篆廣靈卽事

來臨

廣靈縣誌

卷十 藝文

六

傲吏茹蔬樂有餘，清虛莫嘆食無魚。  
等閒片晷了公案，一日猶讀半日書。

廣靈道中呈李谷愚明府

靈卽縣令岳宏譽江南人

紆迴巖壑歷躋攀，亂石盤旋行路艱。  
塞杏不紅花欲掃，邊榆初綻莢如環。  
翻飛沙燕隨人舞，駭逸山麇避馬還。  
每過仙源須薄暮，前村燈火近城闌。

豐水夜月

李煥斗

城南風水夜鱗鱗，一望平川白似銀。  
靜影玲瓏飛玉鏡，寒光蕩漾躍冰輪。  
三更遣興花當澗，十里尋谿月近人。  
况是清秋風景別，更從何處滌氛塵。



社臺朝雨

李煥斗

清曉乘閒登社臺東南佳景望中開一川時雨滋禾黍百谷風濤吼澗雷山邑有年今可卜天工覆育自從來他時報賽酬龍母敢靳馨香薦玉醅

千福曉鐘

李煥斗

千福山頭春雪消兩川煙景夾山腰晨鐘忽發天邊響大覺初回夢裡蕉衲子入雲飛錫遠香厨隔澗引泉遙上方城郭聞雖近莫遣笙歌到寂寥

斗山積雪

李煥斗

翠巖迢迢南斗間瓏瑤積雪隱蒼顏全封鳥道無行

徑迥入銀河絕仰攀玉峽盤回龍矯矯瓊巖深鎖月灣灣虛疑詩思侵人骨翹首雲中見此山

壺泉春柳

李煥斗

平原野望一山孤別有風光到玉壺幾度尋春詩未就數回遣興酒頻呼雨餘烟柳仍含綠風過巖泉似濺珠莫羨河陽桃李色青青兩岸更堪圖

飛鳳晴嵐

李煥斗

一道青山北郊橫傳名飛鳳跨遙天摩空欲吸柔乾才展翅應遮太白巔四序煙嵐迷出入終朝青靄異推遷翩躚宛似來儀瑞重樂虞周擊壤年



聖泉松風

李煥斗

古刹深藏倚澗阿何年選佛在烟蘿  
兩崖削壁窺天卜一水通幽灌木多  
谷口松濤疑嘯虎風邊鈴閣似鳴珂  
登臨欲認前朝蹟尚有莓苔碑可摩

白羊暮靄

李煥斗

重重紫色白羊頭聞說仙人頂上遊  
殘日石林紅靄靄黑雲牛馬晚悠悠  
夏王荒隴狐狸夕延昭孤城虎豹秋  
翹首故園家萬里西山一望可勝愁

初夏亂嶺關遇雪

李煥斗

冒雪登崖行路難臨高自悔着衣單  
邊山夏月如冬

月只少梅花拂繡鞍

過火燒嶺

李煥斗

策馬崇岡行步難杏花枝上鳥緡蠻  
自從身作延陵長幾度衝寒過此山

會課示諸生

李煥斗

我昔臨斯邑諸生多少年衣冠何濟濟  
詞貌亦便便期爾青雲器滿殼以當前  
倏忽六七禩諸生歲月遷

皇家

兩羅士麟鳳未爭先諸生不自振莫道有司愆  
隣封各脫穎爾徒空羨淵詎獨諸生恥余顏亦赧焉  
懷哉須結網及時勿遲延高山勤仰止宮墻勉鑽研



白雪無凡調青雲在目前杯酒聊相告論文效昔賢  
勿嗔多責備交以直道全

社臺朝雨

王五鼎

迢嶢龍宮鎖絳臺此山生面又重開三農夏日瞻甘  
澍二月春風起蟄雷海氣浮空天際立晨光飛溼望  
中來年年乞與神靈祝禾黍含滋若醞醅

豐水夜月

庠生 白屋龍人邑

寒潭幽徹躍潛鱗浪蕪推花簇爛銀蜃母遺珠升海  
嶠天孫肅駕輾冰輪中宵湛露虛涵影一片青光冷  
照人回顧悠然沉萬籟水雲縹緲靜無塵

廣靈縣誌

卷十 藝文

九

社臺朝雨

前人

幾回憑眺獨登臺山色參差曉未開祠宇翬飛聯碧  
漢梵音傳偈隱殷雷斷雲拖墨穿林出積霽移陰拂  
面來四野蒼茫圖畫裏神功寂若似傾醅

斗山積雪

庠生 王振斯人邑

崔嵬迥出白雲間春去秋來縞素顏嶺上梅花何處  
問望中鶴影杳難攀碾成晶玉原同色踏破瓊瑤第  
幾灣姑射羅浮清可並何須海外問三山

壺泉春柳

庠生 白屋隆

突聳蒼崖片石孤山頭日日聽提壺澤濡新柳千章



潤風激寒泉萬竅呼嫩葉舒金泚湛露清波漱玉漾  
明珠右丞若使重相見一副烟稍望裏圖

千福曉鐘

庠生李長榮邑人

日出扶桑烟霧消松間殘月去山腰花宮鯨韻清塵  
夢禪舍莓苔映綠蕉諸介乍聞天路近一空方悟世  
緣遙年年風物不相異惟有寒雲鎖寂寥

斗山積雪

李長榮

遙峯隱隱碧雲間一夜冰花裹舊顏綴玉瓊枝松欲  
折尋梅瑤圃徑難攀美人踏月從何覓高士移床第  
幾灣說與南人渾不信夏深猶見雪鋪山

廣靈縣誌

卷十 藝文

三

白羊暮靄

李長榮

春融芳草滿山頭鎮日喜看鹿豕遊黃石叱來遺跡  
遠魯戈麾處夕陽悠險因天設秦關古景被風彫漢  
塞秋歷盡興亡看此夕白雲紅日不勝愁

壺泉春柳

齊管

平川突兀小山孤山下靈泉若映壺吹浪池邊魚藻  
動啼晴枝上鳥聲呼謾誇彭澤千層柳且看眉山萬  
斛珠花滿河陽仙令植莫教悞認六朝圖

廣靈八景

刑部尚書魏象樞蔚州人

壺流一派潤桑田社雨濛濛雉堞邊晚聽鐘聲千福



頂遙看雪色斗山巔  
摩空鳳羽瞻雲氣  
傍石春泉覆柳烟  
更喜松濤來萬壑  
白羊頂畔說豐年

豐水夜月

李振藻  
蔚州人

澄波天共碧  
素影映寒流  
蕩漾清光滿  
潺湲夜色幽  
沙明宜宿鴈  
石靜不驚鷗  
水底魚龍動  
驪珠若可求

社臺朝雨

前人

登眺怡情處  
輕陰朝雨飛  
空濛迷宿露  
黯淡掩清暉  
烟鎖龍宮隱  
雲連雉堞微  
凭高凝望久  
冉冉濕人衣

千福曉鐘

前人

紺殿重霄上  
晨鐘下界聞  
清音來碧落  
逸韻繞行雲

廣靈縣誌

卷十 藝文

三

瀏澆山光淨  
噌吰曉色分  
靜聽看悟道  
從此息塵氛

斗山積雪

前人

高巖當戶牖  
積雪未全消  
翠嶂遺殘壁  
晴峯砌碎瑤  
玉龍飛不去  
鹽虎若爲妖  
誰道西陵遠  
依稀憶斷橋

壺泉春柳

前人

一峯奇絕處  
石罅吐甘泉  
疎柳浴新月  
垂楊淡曉烟  
綠陰堪避暑  
清蔭可調絃  
坐聽鶯聲轉  
胸襟自爽然

飛鳳晴嵐

前人

青嶂如屏峙  
紆迴路幾盤  
拖青疑點翠  
變赤若流丹  
杳靄雲迷樹  
離奇霧鎖巒  
翺翔如起舞  
凝睇亦奇觀



聖泉松風

前人

何處宮商奏松陰夜有聲驚濤鳴萬壑爽籟靜三更  
似聽雲和瑟如聞緱嶺笙石泉相伴響零露更淒清

白羊暮靄

前人

黛色萋葱遠依依日欲斜層峯籠曉霧殘照映明霞  
漸覺流雲換移將薄靄遮相看久不厭乘興訪仙家

豐水夜月

少李旭升 蔚州人

渺渺長河接遠天碧空如洗映平川競看玉鑑雲邊  
出忽訝冰輪水底圓皎潔寒光驚鳥鵲婆娑素影下  
嬋娟琉璃千頃渾如畫勾引幽人夜未眠

廣靈縣誌

卷十 藝文

三

社臺朝雨

前人

向曉登臺雲氣昏蛟龍吐沫灑郊原初迷遠樹微烟  
鎖漸漲前溪細浪噴四野農夫皆戴笠幾家村店未  
開門空濛景色誰能畫惆悵行人欲斷魂

千福曉鐘

前人

初日方升曉氣清崇巖風送寺鐘鳴驚回夢幻悠揚  
韻催起僧伽斷續聲嚮過層空雲出岫音聞下界客  
登程鏗然戛擊相賡和喚醒人間名利情

斗山積雪

前人

遙瞻曙色映晴巒積素凝暉夏亦寒高矗尖峯排玉



笋低眠圓石疊銀盤光搖雲漢驚飛鴈色妬琪花招  
舞鸞誰道峩眉天際遠與君同作蜀山看

壺泉春柳

前人

碧峯高處瀉寒流柳色參差映寺幽雨後眉纖含翠  
媚風前腰細弄絲柔綠陰密蔭堪消暑清影蕭疎更  
耐秋不似灞橋攀贈處依依牽惹別離愁

飛鳳晴嵐

前人

青嶂如屏綺繡鋪儼然噉羽下雲衢鳥窺穹谷雲霞  
變人到中峯景物殊乍見烟光籠遠樹遙看嵐氣映  
平蕪昏朝相對襟懷爽付與丹青入畫圖

聖泉松風

前人

古寺相傳幾百年虬枝屈曲鎖蒼烟聲來空谷疑猿  
嘯濤瀉清宵醒鶴眠謾謾似聞金粟墜淒淒如聽玉  
簫傳夜深月上芸牕靜逸韻偏能到枕邊

白羊暮靄

前人

層巒高峙鬱蒼蒼疊翠含烟鎖夕陽燦爛朱霞騎日  
影迷離靄薄山光樵人罷採收柯返牧子思歸驅  
犢忙暝色依微堪遠睇白雲深處是吾鄉

麟

魏象樞  
刑部尚書

陽回北斗一麟孳牛尾屬身更不疑紫塞籠州徵瑞



氣龍沙度雪接昌期  
和雨潤逢年後子孝臣忠報  
國時自是

聖朝仁德感輶軒  
好載史中詩

其二

驚聞神物產山田  
陰雨牛鳴豈偶然  
斗室霞光村牧  
怪空梁月照野人  
憐香舍七竅  
端端異甲裂千紋  
片堅倘得靈胎圖  
上苑

御屏應注使君賢

前題

魏學誠  
蔚州進士中書

萬土車書正永清

廣靈縣志

卷十 藝文

十四

九重雨露散邊城  
頓教寒谷生春色  
遂有深仁暢物情  
赤紱果從何日繫  
青編應待此時成  
惜君不作潛龍種  
空向人間得美名

前題

李昉辰  
蔚州侯補京職

延陵治譜達明光

聖代符徵景歷昌  
已見祥麟生晉土  
真同彩鳳到岐陽  
麇身牛尾文霞燦  
馬足龍麟繡紱香  
欲贊高深慚載筆  
萬年恭已仰虞皇

前題

李旭升  
蔚州進士

太平時節事多幽  
掩卷河圖彷彿求  
口吐丹書身是



甲軀非白鹿背皆疇農房止見飛虹降上苑還宜畫  
影遊有道吾

君文德盛萬方從此荷天休

前題

李煥斗

孟冬十月冰堅池延陵忽覩麒麟孳野老獻來驚且  
疑咸稱此獸見聞希更言牛母孕於茲陰雨長鳴登  
山岬或逐川虹飲澗漪不受鞭驅不曳犁皎日當空  
出腹啼朱霞爛熳天馬嘶錦麟繡甲烏玉蹄頭如蒼  
龍尾如璃脊似靈鼉腹似龜交加四股聳熊羆光映  
星文何岐嶷傳於史兮歌於詩豈若吾身親見之

廣靈縣誌

卷十

藝文

三

聖人在御萬邦熙後比軒皇前比羲天生神物應昌期麟  
爲國瑞固其宜西狩會獲泣宣尼玉書徵異又同時  
何幸明良會合奇卿雲復旦日重離河清海晏衣裳  
垂繪圖若達

九重知羣臣拜手

天顏喜

詔入新編定勿遺正是曠古靈胎不可沒教兒染翰一賡  
題

祝

萬壽

韓國瓚



玉露飄青瑣金鋪立廟廊  
爐烟添柳重韶樂順風長  
委佩搖秋色峩冠帶曉霜  
中秋祝

聖壽萬寶慶無疆

王戶曹

尚文

韓廷魁

英廟蒙塵日奸臣悞國時  
王師一鼓盡虜騎四郊馳  
玉石俱爲燼衣冠悉見羈  
神龍悲失水凍雀苦無枝  
泣血瞻行殿傷心踵賊帷  
空傳袁盎脫終結仲由綏  
浩氣山河壯英名萬古垂  
我來瞻廟貌留作畫臣碑

李光祿

景

薛撝謙

烈烈西華宰城亡身與亡  
執戈衛社稷授甲保金湯

廣靈縣誌

卷十

藝文

三

外絕虬蟬援中無雀鼠糧  
艱危同越石拮据似睢陽  
罵賊辭何壯臨亡氣亦剛  
孤忠昭白日大義凜秋霜  
兩錫絲綸寵千秋俎豆光  
不令顏許輩擅美獨流芳

前題

韓士傑

取義亡身骨鯁臣精忠大節與時新  
魂依北闕家何有命絕南州志未伸  
古墓雲封詩是淚孤城露起血爲燐  
獨羨常山一片舌今日猶堪泣鬼神

袁孝孫

表

譚民聽

垂髫應未學至孝已天成  
譎諫規親過微言起悟情  
乃翁全晚德而祖保餘齡  
偃草留奇跡懸杞著美名



孩提能幹蠱間里共敦行救水娛親志美熬竭子誠  
牽車而服賈秉耒以深耕孝養厥父母毋忝爾所生

韓孝子 一蘇一歐

李元凱

骨肉緣枝葉急難必相先爰有韓家子時當開國年  
父爲賊所縛子代父求憐兄弟被慘毒肌膚無屬連  
哀哉弟已斃幸矣翁猶全雙孝萃一族後生駕前賢  
存亡兩無愧伯仲俱足傳輶軒如有採將以付斯篇

周義士

于德于道

孫尚元

國朝定鼎初豺虎方構亂結黨肆逆凶居民若塗炭  
城池久被圍牧圉誰當捍倡義集鄉兵挺身赴國難

廣靈縣誌

卷十 藝文

三

詩書雖夙敦金革未習慣衆寡勢旣殊貞邪何由判  
弟兄俱慘亡血肉同糜爛英俊事不成廢書起三嘆

王主事殉節沙漠

尚文

白百齡

明帝還師土木間中臣失律陷邊關九重日月光何  
在千里鑾輿駕莫攀徒跣但思依聖主殺身猶似列  
朝班侍中有血君王識留取芳名配段顏

李光祿殉難西華

景

杜暉

六七猖狂勢自橫西華萋爾守孤城情甘赴死臣心  
盡志矢舍生大義明清潁長留雲靄鴻溝猶憶淚  
盈盈要知俎豆千年事誰信當時肯幸生



韓一蘇一歐兩孝子

社 叢

闖孽縱橫日月昏韓家孝友聚南村但知救父情偏  
急詎信捐軀志愈敦萬死可憐傷令弟更生猶幸得  
賢昆干戈擾攘逃亡裏誰識人倫重報恩

周李中表起義兵

于德于道真

劉 輝

攻城土賊仗姜瓖周李援兵起北鄉共曉妖軍方濟  
濟那知吾志自堂堂周家兄弟成仁樂李氏英雄死  
義香事越百年精氣壯至今鄉里有輝光

王戶曹

尚文

王國瓚

小豎弄兵事遠征也先騎到地天崩從軍無狀臣當

廣靈縣誌

卷十 藝文

六

死願作忠魂扈聖明

袁孝孫

古絕

宋生桂

懸柩一譎諫綱常萬古存幹蠱真孝子何僅稱慈孫

王戶曹

尚文

王賜名

由來志士性情真督餉從軍翊至尊歛隕大星摧柱  
石長留浩氣振乾坤君恩崇祀光泉壤廕典榮申耀  
里門展卷低徊三歎息未訝薤露已銷魂

李光祿

景

杜 晟

拜爵敢辭守土難赤心不覺此身單孤忠血染河百  
水隱恨魂歸塞北巒蜀將無頭生氣在長山有雪



聲殘墓碑憑弔堪惆悵風動白楊近厲壇

學舍春夜遇雨

司訓周天申

春雨纏綿晝迄宵遠山幽岫水聲遙杏林暗想滋春色柳岸潛知潤綠條農喜詰朝和露種牧愁午夜冷風飄淒涼學舍聽殘漏百結憂思酒不消

吊全義士

杜暉

烈烈英雄功最奇短刀取救夜飛馳恨無史叙全城績空有人嗟乏嗣悲千載白雲山渺渺一抔黃土草離離可憐寒食梨花雨誰向春風奠一廛

節婦李氏

陳吉榮母

孫尚元

廣靈縣誌

卷十 藝文

无

苦節終身事可憐追思一度一潸然弓箕負荷兒先隕門戶操持婺更賢撫有弱孫傳素業應無遺恨到黃泉殮衣點點血痕透布縷看來勝畫箋

周義士兄弟

李冀附

王國瓚

一時邊地聚奸民韋帶英雄自有真動地千軍聲震野仰天一慟任亡身烈風特異狗名士高節應推草莽臣更有義俠同赴難山川輝映幾完人

十月朔日暮雪思親

韓士奇

秋盡冬初日色暉噴前徒化紙錢飛蕭蕭暮雪殺塚草慘慘愁雲動我邴郊外空懷王哀意高堂難舞老



萊衣音容欲覓歸何處獨守孤墳不忍違

飛鳳晴嵐

王懋業

韶光掩映潤如酥霞繞峰頭疑有無何日坐余山閣  
上春花春鳥繪成圖

壺泉春柳

王惠業

嫩綠池邊柳繞林聽鳥鳴新鶯初出谷願借一枝榮

豐年

白維翰

太平天子當陽位鳳舞麟遊治化隆春作秋成感地力日  
暄雨潤戴天功

一人有慶一時泰萬寶偕登萬國同玉燭正調翔洽日南

廣靈縣誌

卷十

藝文

三

風習至樂年豐



廣靈縣舊誌序

從來郡邑有志猶國之有史家之有乘志也者紀一方實錄將以維風勵俗善政宜民上佐太史轡軒之采下資後學法戒之規甚盛典也豈徒備稽考廣聞見哉方今

聖人在上敦崇古學誕敷文教屢諭天下纂修通志以昭文獻之盛又

特命直省大臣選道府之通典故者遍閱邊腹州縣衛所爰諮爰諏凡山河城池方名古蹟一一備細繪圖彙成總帙恭進

廣靈縣誌

卷末

舊序

一

睿覽用以編輯成書煌煌鉅典孰不欽光華之復旦哉斗以西江陋士謬籍南宮已未冬叨承

簡命作令廣靈廣靈古延陵縣也甫下車觀其山川城廓屹然金湯風土人物淳龐沕穆再稽賦役戎祀師儒典禮甲第先民又皆與他邑相頡頏居然雲鎮奧區焉已而詢及邑誌吏胥乃以邊土少文兵燹殘失是應嗟嗟宰司百里封疆邑之事國之事亦卽家之事也家之中經紀無文秩序無統雖有陶朱倚頓之富金谷梁園之積終不足以承先德而大家聲而况封疆司牧國之重寄攸關若策府無稽又何以維風勵



俗善政宜民資採訪而垂法戒耶于是視事數月急圖所以編輯之奈值洊饑之會邑中蒿萊滿目鳩鵲傷心夙逋盈累徵書戒嚴斗於此時如芒刺背奚暇及鉛槧事乎歲辛酉蒙

上臺哀籲幸叨

皇恩浩蕩屢賑屢蠲休養元黎有司因得施其補救早作夜思招徠勸課嗣是逃民漸復逋賦漸完士氣漸振頽廢漸興雖邊方殘壤終難同於腹裏腴地然視向日蒿萊鳩鵲之狀則亦欣欣然有起色矣醫家言曰急則治其標緩則治其本今日之廣正當固其本而

養其元也纂修之役尚容已乎爰謀之廣文任君之琇劉君介祉紳士王君五鼎李子長榮白子屋隆王子振斯王子逢泰以圖其事諸君僉善余言用是旁蒐博採於生員王所州家得勝國之殘篇續以近代之軼事叅互考訂訛者正謬者闕遺者補闕者續疑者闕信者徵寧質無浮寧真無僞寧嚴核無濫觴寧朴野無文飾次第成帙分爲十綱列爲六十目書成斗捐資若干緡不敷復行募助適因靈邱刊志梓人之便召付剞劂凡五閱月而事竣斗不敏不知文事仗諸君虛公編較畧有可觀俾百餘年淹沒不傳之



緒賴以復明而斗六年來惓切不忘之心亦以不負  
是以歡然拜手而樂題其弁也敢曰斐然成章克贊  
聖天子文明之化哉謹序

康熙乙丑歲中和節知廣靈縣事臨陽李煥斗恭題於邑  
署內省軒



邑誌小序

邑之有志將以著往招來勵人心維風俗也詎甯缺而不備哉然而廣靈之誌亦極難爾古板淪亡舊帙殘失雖有斷簡不過存什一於千百今欲舉百餘年之淹沒振興於一旦憑虛揣摩懼其誕而背古尚詢故老慮其訛而不經此歷來收廣靈者往往思一纂修而擱筆躊躇也邑侯李公蒞任五年政通人和百廢俱舉惟以邑誌淹失爲深懼爰進紳衿而商之曰覽鏡而見奸媼觀史而知法戒廣靈雖塞北殘壤居然

朝廷提封凡天文地理大經大典無一弗全獨邑誌廢缺無考宰斯土者何所取衷以資化理也哉諸君當同文之世盍謀所以編輯之衆唯唯稱善相與博採羣議掇補舊章分綱列目編輯成書公政務之餘虛公裁定首捐已資倡募紳士付之剞劂書成頒布童叟樂聞雅俗並賞余忝司邑鐸得與較閱披誦之餘不禁喟然歎曰公宅心忠信敷政明決不恃已見不棄衆長卒能與諸君同心合志共成茲舉一志也而公之全體見焉觀其序事敷詞有倫有要不懈不濫是足以著往招來勵人心維風俗也若夫摭飾諛聞誇



張溢美亦奚裨於邑哉學諭龍門任之琇謹題

廣靈縣誌

卷末 舊序

五



序

周禮馮相氏用土圭之法正日影以測地中則五土之異宜四方之殊俗職務詳也誌之由來尚矣廣靈處冀方之西北介燕趙之間其山川之峭拔人文之慷慨維昔已誌之矣然自明迄今閱百餘年幾經變遷而舊誌淪失所存餘緒遺珠實甚夫以古形勝之區而僅存其一二事於殘篇斷簡之餘將何以羽儀皇圖而昭示來茲哉幸值邑賢宰李公來牧茲土公性行純良嗜古不倦卽簿書之暇而窮經讀史不少輟下車六載邑之中庶務畢舉爰取前誌而重訂之廣諮

廣靈縣志

卷末 舊序

六

逸老羅列舊文每帙必進紳士折衷以成厥篇較前誌於什之中而增其七定爲剛目分之十帙凡五逾月而告竣夫以作誌之難也固有侈汗牛充棟而不得其旨謂者獨公秉篤實之心編摩得體若星緯纏度之離離也淵停岳峙之秩秩也生齒版章之蔚蔚也封建定而禮祀修文獻徵而典型著且治內治外之不嫌其繁也職詳職要之不遺其細也俾乘輶軒者得採而上貢之其有裨於

盛世之版圖者功非淺鮮耳至於革薄存忠惇德允元使後之讀是篇者憬然於法戒之式憑也則誌不特



一時實所以風百世也此又公用意之深且遠也  
康熙歲次乙丑仲春月學訓長平劉介祉題



廣靈縣舊誌序

萬歷御極之二十六年余承上命來官茲土甫蒞任  
五月偶獲縣誌於故牘中啟視之朽爛幾盡後國監  
李子延齡家學淵源五世業儒多所錄紀出以告余  
余遂喟然歎曰邑有誌猶國有史家有乘也由此可  
彰往以察來由此可卽古以驗今不則有司之所事  
茲土者謂何而可無勸懲也耶纂集旣久則不無殘  
缺失次之訛顧懇求鄉選元董君效白君琬重加考  
訂使殘缺者補失次者序類大綱六卷析細目爲四  
十四條所謂筆則筆削則削以成一家之全集云是

廣靈縣誌

卷末 舊序

八

可壽諸梓也以垂不朽前知廣靈縣事關西古徵河  
華杜一奇叙



康熙乙丑年修邑誌姓名

計開

知廣靈縣事新淦李煥斗谷愚輯編

教諭河津任之琇瑩石

儒學

訓導長平劉介祉衍百

較閱

邑人王五鼎金鉉纂修

王逢泰遇巷

學生

李長榮吐秀

白屋隆乃升

同訂

王振斯蝨羽

廣靈縣誌

卷末

前修誌姓名

九



廣靈縣誌

辨疑

新誌於舊誌內或增或刪或改訂據同事之人公共商酌者付列於後

考宋楊延昭為將時守遂城守保州及為帥把守高陽關益津關瓦橋關以終其身且廣邑在宋時沒於荒服延昭絕無在此築城屯兵事似屬訛傳今查防險城在臨灌峪相傳明防守武弁屯兵所築遺趾見存俗呼六郎城非是宜刪去韓廷魁

查邑屬八景皆有指實獨斗山積雪未經著明地名

廣靈縣誌

卷末 辨疑

十

近邑並無此山若云出自一斗泉又隔數山邑中不能望見其云當邑中戶牖城裡外共皆見似屬訛傳

杜璋

美良川在城南留老疇加斗一帶考通鑑綱目隋恭帝侑皇泰二年宋金剛遣其將尉遲敬德尋相將兵虜永安王孝基等敬德將還秦王世民遣兵部尚書殷開山等邀之於美良川大破之集覽曰美良川在蔚州廣靈縣南屬上都

國朝魏敏果公上李毅可巡憲書云蔚之西舊名美良川載在唐書蓋言俗美而民良也韓廷魁



舊誌紀凶逆誅旣往以警將來固其所宜但舊誌於逆賊朱廷佐李青許廷旺等特爲標出而忠義周於德周於道李萇名下註曰詳見凶逆頗爲失體今更改之韓士傑

誌內所載陵墓一條按官民葬處未有稱陵者卽城東高塚傳爲金時諸王陵亦全無可考皆揣度之辭則陵墓應改爲塚墓杜暉

山川部按字典川者穿也水行地中川原以水言也舊誌火燒嶺等口於水無與者應行刪去杜暉

舊誌王公尚文入忠義李公景入鄉賢分屬不合應

廣靈縣誌

卷末 辨疑

十一

行改正杜暉

按唐史武德三年秦王世民督諸軍擊王世充于洛陽屯軍北邙四年夏王建德將兵救之世民將驍騎出虎牢東建德迫於虎牢不能進建德出牛口峪世民薄其陣擒之世充亦降世民俘至長安赦王世充斬竇建德虎牢河南地在洛陽東牛口峪去虎牢不遠則建德被擒之處旣於關外無涉長安今之陝西西安府則建德死處亦於關外無涉舊誌附會應行

刪去

韓士傑杜暉

臨灌俗呼林關查府誌並古碑碣皆稱臨灌以山旁



有峪出水可灌田故名臨灌也今爲改正韓士傑

忠義祠有楊公諱汝登者查係明貢生任湖南醴陵

縣主簿其忠義實蹟畧無可考詢諸公之後人亦無

以對姑存之以俟識者白百齡



廣靈縣誌

雜錄

古人云禮失而求諸野官失而學在夷鄰子之對宣聖固已深幸之矣至風俗之淳漓人心之誠僞又有不可以疆域限者儒者動稱鄒魯爲禮義之邦江浙爲文物之區似關北之民風土俗無足比數余到關外數年見其交接之事其厚者薄者不一其等較之關內實各有優絀故並錄之以備一則

一放債之事各省類在三分以上甚至羊羔利印子錢短票錢凡可以剝削取利者不遺餘力廣邑則銀錢不過三粟米不過五臨時或讓若干違禁取利者甚少

廣靈縣誌

卷末

雜錄

三

一正供錢糧各省立戶分認有拖欠者卽同胞亦不過問廣邑有欠糧者如真不能完納親族由近及遠非甚貧乏皆代爲料理

一廣邑貧乏之家竟有生女十歲以外卽行遣嫁者古人云未知爲父母之道而俾之婚嫁教之死也不可不知

一廣邑之俗以歛錢上控告官告吏爲辦公事無知之人從而和之試看或羅法網或遭冥罰不於其身必



於其子孫有甚好處速宜改悔

一廣邑男恥爲奴僕女恥爲小妻此等氣節甚屬可嘉  
一稱呼凡父行如姊妹之舅姑關內以伯及伯母稱之  
爲父行者與父爲兄弟是以父爲主者也關外以姨  
夫姨娘呼之爲父行之妻與母爲姊妹則以母爲主  
者也此等俗稱關外不如關內

一關外師生類有凶終隙末之事總由門生入庠之後  
謝禮在所必講一則出納之吝一則無厭之求此風  
甚屬可鄙

余足跡所至雖不過六七省從無終年無竊案者余  
宰廣七年竊案不過三次又皆他處流民古風真甲  
天下矣

廣邑山多無材木水多無魚蝦產值千金者卽推巨  
富故素有窮山窮水窮財主之嘲大抵黃羔供老疾  
少者饜糟糠瘠疲亦甲天下矣

閱備荒卹族一條誠禦荒睦族型仁講讓之善術也  
但所列調處之法頗有可疑豐年出陳易新擇族中  
殷實者領出變糶秋收照數還倉並不加息凶年按  
戶之口計穀之數出倉賑濟又不追本外有鼠糧之  
耗損吉凶之施助工食之費用物必滋生不已而後



能繼不竭之應用不識始初如何積儲後來如何滋生給補始能經久不窮也如曰做社倉之法行之社倉之法遇豐年卽行捐輸凶年賑濟不足別有動支不識此倉每遇豐年卽行捐輸否抑別有補給生滋之法否不然倉中止有此粟族中生滋日繁倘值凶荒頻仍將何爲繼今所列已效條約止有支用之例並無積儲生滋補給之法似非經久萬全之術

元凱

管窺蠡測謹陳末議

余曰生所辨出多入少難以經久真籌畫精密匡余不逮也余之設法所以未計及於此者在當日原爲

余一族言之未念及他族也余族有祭田每歲所餘盡入此倉其居官者每歲酌捐俸餘再益以豐年春放秋收所貴糶賤糶之穀所以不需再捐而倉自裕然此亦安能使家家如一哉今照生所議凡立此倉者必其知木本水源之義族有仁厚之風者也今於條約內增以豐年酌捐一條其他項可添入者仍行附入則此事自可經久而不匱矣

一業動歸主先儘親鄰之說固爲法例所禁但關外舊規丁倒累戶戶倒累甲守土者又當因地致宜也